

Ntsiab Lus Ntawm

Tswv Yexus Rooj Mov

Hauv Koom Haum
Giám Lý Liên Hiệp

E. Byron Anderson

Ntsiab Lus Ntawm
Tswv Yexus
Rooj Mov

Hauv Koom Haum
Giám Lý Liên Hiệp

E. Byron Anderson

Ib tus Hmoob nyob Nyabhlaj (Vietnam) txhais phau ntawv no.

Txhua nqe Vajluskub tau rho tawm los ua pav pwv rau hauv phau ntawv no yog tau rho los ntawm phau txhais Tshiab (New Revised Standanrd Version), luam tawm xyoo @ 1989, tau txhais los ntawm koom haum Cob Qhia Vajluskub Ntawm Txhua Pawg Ntseeg Tswv Yexus Khetos (Church of Christ) ntawm tebchaws Amelikas. Lub koom haum no twb tso cai tau siv txhua nqe Vajluskub no.

NTSIAB LUS NTAWM TSWV YEXUS ROOJ MOV NYOB HAUV KOOM HAUM GIÁM LÝ LIÊN HIỆP. Yog phau ntawv tau tsim muaj nyob rau xyoo 2014, thiab yog phau ntawv siv cob qhia thwjtim. Phau ntawv no txwv tsis pub luam tawm mus ua lwm yam yog tias tsis tau tso cai. Peb tsuas pub qiv tej feem me me hauv phau ntawv no coj mus ua pab pwv rau nej tej zaj qhia xwb. Yog xav paub ntiv txog txoj kev tso cai, thov sau ntawv tuaj rau: info@umcdiscipleship.org.

Txheej Txheem

Lus Qhib Thawj.....	4
Cov Tim Khawv Hauv Vajluskub.....	5
Cov Npe Hu Txog Tswv Yexus Rooj Mov.....	8
Vajtswv Txojlus Thiab Tswv Yexus Rooj Mov.....	12
Kevcai Txhawb Nqa Ua Tsaug.....	14
<i>Cov Lus Nug Txog Kevcai Txhawb Nqa Ua Tsaug.....</i>	17
Yam Dabtsi Twb Tau Tshwm Sim?	19
Qhov Uas Khetos Tshwm Muaj Tiag.....	21
Leejtwg Thiaj Muaj Cuab Kav Txais?	23
<i>Cov Lus Nug Txog Tus Muaj Cuab Kav Txais.....</i>	26
Leejtwg Yog Tus Tsim Nyog Tau Txais?.....	27
Hov Ntev Noj Ib Zaus?	29
<i>Tej Lus Nug Txog Pes Tsaug Zaus Thiab Lub Sijhawm</i>	31
Txoj Kevcai Txais Noj Tswv Yexus Rooj Mov.....	33
Lwm Lo Lus Nug Uas Pheej Ntsib	35
<i>Nqes Tes Coj Noj Tswv Yexus Rooj Mov.....</i>	36
<i>Tus Coj Thiab Tes Haujlmw</i>	41
<i>Ua Tib Zoo Txog Ncuav Thiab Khob</i>	45
Lub Ntsiab Lus Ntawm Sab Ntsuj Plig Txog Tswv Yexus Rooj Mov	
Dawb Huv	48
Ntaub Ntawv Nyeem Ntxiv	49
Txog Tus Sau	50

Lus Qhib Thawj

Yog ib yam uas zoo thiab dawb huv tshaj plaws rau cov uas tau nqua hu tuaj rau ntawm Tswv Yexus rooj mov thiab koom noj ua ke. Nyob rau ntawm qee tus, thaum tau hu mus koom noj Tswv Yexus rooj mov yog tabtom ua rau lawv rov qab nco txog tej lub sijhawm dawb huv hauv lawv lub neej, xav txog tej kev sib raug zoo nrog pawg ntseeg thiab txog Vajtsww txoj kev hlub tshua, uas yog txoj koob hmoov pub dawb uas tsis tu. Nyob rau ntawm lwm tus, rooj mov ua rau lawv nco txog tej kev tsis sib haum hauv pawg ntseeg: xws li tsis muaj txaus kev txais tos zoo siab hauv qee lub pawg ntseeg, tej kev cheem tsum txog lub tswvyim los daws tej kev tsis sib haum ntawm tus ntseeg thiab pawg ntseeg, ntawm tsev neeg thiab ntawm txhua pawg ntseeg ua ke, txog kev txhaum thiab tej yam uas tau pob puag lawm. Tej teeb meem no nqua hu peb tig rov qab los tshuaj xyuas dua peb txoj kev paub meej txog ntawm Tswv Yexus rooj mov.

Phau ntawv no tau sau muaj yog qhia txog lub ntsiab lus ntawm Tswv Yexus rooj mov thiab yuav coj li cas (Holy Communion) nyob rau hauv Koom Haum Methodist – Giám Lý Liên Hiệp, tshwj xeeb yog qhia txog: *Tej Yam Zais Ntxhis Txog Rooj Kevcai No: Pawg Ntseeg methodist Kev Kawm Paub Txog Rooj Mov* (This Holy Mystery: A United Methodist Understanding of Holy Communion) twb tau lees yuav los ntawm Rooj Sab Laj Qib Siab Hauv Koom Haum Giám Lý Liên Hiệp xyoo 2004 thiab kuj rov qab tau thooyim rau xyooj 2012.

Nyob rau hauv phau ntawv no peb yuav nrhiav kawm paub txog qee lo lus nug txog lub ntsiab lus ntawm Tswv Yexus rooj mov: Yam dabtsi hauv Vajluskub qhia peb paub txog rooj mov dawb huv? Rooj mov dawb huv tau hu tej lub npe sib txawv li cas thiab nws muaj lub ntsiab lus li cas? Thiab tej lub npe hu ntawd yuav qhia peb paub li cas txog lub ntsiab lus ntawm Rooj Mov dawb huv. Lub hauv paus thiab kevcai coj rooj mov dawb huv nws pab tau li cas txog tej kev kawm paub no. Tej lus txhawb nqa ua tsaug (great Thanksgiving) ntawm Vajtsww lub rooj yog dabtsi? Rooj mov dawb huv muaj nuj nqis li cas rau pawg ntseeg lub neej? Nyob rau hauv koom haum Giám Lý Liên Hiệp, leej twg yog tus muaj cai tau noj? Hov ntev peb noj ib zaus? Vim li cas peb noj rooj mov dawb huv dhau los ntawm ntau txoj kev sib txawv? Dhau tej lus nug txog lub ntsiab

lus, peb yuav npaj tej lus teb uas sawv daws pheej nug txog kev coj thiab noj Yexus rooj mov, tej lus nug xws li: Leejtwg yog tus coj? Kev xav paub txog ncuav thiab lub khob nws zoo li cas? Thiab pawg ntseeg yuav coj li cas nyob rau tiam vam meej no?



Cov Tim Khawv Hauv Vajluskub

Muaj qee zaj xwm txheej hauv Vajluskub yuav pab rau peb nkag siab txog Tswv Yexus Rooj Mov Dawb Huv. Feem ntau peb pheej hais txog zaj xwm txheej uas Tswv Yexus thiab Nws cov thwjtim noj pluas mov kawg saum chav tsev siab nyob rau hmo uas Tswv Yexus raug ntseev siab (Mathais 26:17-30; Malakaus 14:12-26; thiab Lukas 22:7-23). Txhua ntu Vajluskub no puav leej qhia txog hmo uas tus Tswv raug ntseev siab, Nws muab ncuav, ua Vajtsww tsaug thiab muab ncuav ntais, cev rau txhua tus thwjtim thiab hais: “Ntawm no yog Kuv lub cev.” Thaum noj hmo tag, Tus Tswv muab ib khob dej cawv txiv hmab los ua tsaug thiab cev rau cov thwjtim, Nws hais tias: “Ntawm no yog Kuv cov ntshav uas nias hom thawj rau tej lus cog tseg, twb tau nchuav los daws ntau tus lub txim” (Mathais 26:26-28).

Thaum Paulus rov qab piav qhia txog Tswv Yexus Rooj Mob Sib Ncain nyob rau hauv phau 1 Kauleethaus 11:3-26, Paulus ntuas pawg ntseeg txog tej kevcai zoo uas yawg twb tau txais los ntawm tus Tswv Yexus thiab nws rov qab muab qhia rau pawg ntseeg thiab qhia rau peb txhua tus niaj hnub nim no.

Tej zaj xwm txheej uas tau piav txog tej lus uas Tswv Yexus tau hais nyob rau saum rooj mov chav tsev siab tau hu ua Koom Haum Zaj xwm txheej. Zaj xwm txheej yog piav qhia txog Rooj Mov Dawb Huv twb tau pib muaj li cas thiab piav qhia txog Tswv Yexus tej lus samhwm tias Pawg Ntseeg yuav tsum coj noj rooj mov no mus ntxiv rau tom ntej los ntawm Tswv Yexus lub npe kom nco ntsoov Nws!

Tagnrho txhua zaj xwm txheej no puav leej yog hais txog qhov tseem ceeb uas Tswv Yexus cim civ muab tagnrho nws lub cev fij theej txhoj, Nws kev rau siab ntso rau Vajtswv tes dejnum thaum tawm tsam nrog txoj kev tuag thiab tus Tswv lub siab tshua txog Nws cov thwjtim. Thaum peb saib txhua zaj xwm txheej no dhau los ntawm txoj Kevcai Hla Dhau, peb pom tej yam uas muaj nyob rau hauv Kevcai Hla Dhau (Khiavdim 12:1-28) thiab Tswv Yexus txoj kev tuag saum tus ntoo khaublig muaj kev sib txuas ua ke. Zaj xwm txheej hauv phau Khiavdim, peb pom cov neeg Yixalayeess tua tsiaj thiab muab ntshav pleev rau ntawm qhov rooj ua lub cim nias rau Vajtswv paub lawv thiab tsis rau txim rau lawv. Nyob rau hauv zaj xwm txheej txog Tswv Yexus rooj mov dawb huv thiab Nws txoj kev tuag saum tus ntoo khaublig, peb pom Tswv Yexus cov ntshav ntws los yog lub cim qhia tias Vajtswv yuav tsis rau txim rau tib neeg vim lawv tej kev txhaum.

Ntawm no tsis yog tej zaj xwm txheej uas thiaj pab rau peb paub zoo txog lub ntsiab lus ntawm Rooj Mov Dawb Huv xwb. Kuj muaj qee zaj xwm txheej ntxiv thiab, pib txwv li zaj xwm uas qhia txog Tswv Yexus pub mov rau cov neeg coob coob noj (Mathais 14:3-21; Malakaus 6:30-44 thiab 8:1-10; Lukas 9:10-17; Yauhas 6:1-13, 25-59), txhua zaj xwm no muaj kev sib thooj li pluas mov saum chav tsev siab dhau tej yam xws li: Tswv Yexus txais ncuav, ua tsaug, ntais faib pub rau sawv daws. Peb pom nyob rau hauv txhua zaj xwm no Tswv Yexus puav leej mov tshua txog cov neeg uas raws Nws qab. Tswv Yexus pub rau lawv noj tsau ntawm sab ntsujplig dhau Nws tej zaj qhia, thiab pub lawv noj tsau ntawm sab nqaij tawv dhau tej ncuav uas Nws ntais pub rau sawv daws.

Tej lus uas tau Yauhas piav qhia nyob hauv (Yauhas 6:25-51) ntuas pawg ntseeg paub tias ntawm no tsis yog zaum pib kuj tsis yog zaum kawg Vajtswv pub mov nyob rau tom tiaj suab puam. Yauhas ntuas kom peb nco txog haiv neeg Yixalayeess txoj kev mus tom tiaj suab puam nyob rau hauv phau Khiavdim (Khiavdim 16:1-17). Vajtswv twb pub ob yam

khoom plig rau haiv neeg Yixalayeess thaum lawv nyob tom tiaj suab puam, ntawd yog Mannas thiab noog ws, txawm yog thaum uas haiv neeg Yixalayeess raug Vajtswv sim lawv siab (Phau Ntawv Nkauj 95:9).

Nyob rau hauv lwm zaj xwm txheej hais txog thaum Tus Tswv sawv hauv qhov tuag rov qab los, peb kuj nrhiav pom qhov uas Tswv Yexus txais khoom, ua tsaug, muab ntais faib pub rau txhua tus. Hauv Lukas 24:13-35, Tswv Yexus tshwm los nrog ob tug thwjtim taug kev mus rau ntawm lub zog Ema-u. Txawm yog lub sijhawm ntawd nkawd ob tug cim tsis tau tus Tswv los ob tug tseem caw Tswv Yexus nrog ob tug noj puas mov ua ke. Thaum Tswv Yexus twb txais lub ncuav los thov foom koob hmoov thiab muab ntais faib rau nkawd noj, thaum ntawd nkawd qhov muag tau qhib pom kev thiab ob tug thiaj cim tau tias tus ntawd yog Tswv Yexus. Kuj zoo ib yam li ntawd, Yauhas kuj sau txog tias Tswv Yexus tshwm los rau cov thwjtim tim ntug hiav txwv, Nws npaj ib puas mov rau lawv noj thiab lawv cim nco tau Nws (Yauhas 21:4-14).

Vajluskub hauv Tes Num 2:42-47, Pawg Ntseeg thaum pib thawj kuj nco txog Tswv Yexus tej lus qhia rau cov thwjtim dhau ntawm: muaj kev sib raug zoo ua ke, koom noj rooj mov dawb huv, koom thov Vajtswv ua ke. Tej uas lawv ua no ua mus zuj zug tuaj thiab xaus los yog tej lub cim zoo tshwj xeeb ua rau ntiajteb feeb paub txog pawg ntseeg Moozoo thaum pib thawj.

Nyob rau hauv txhua zaj xwm txheej no, peb yeej nrhiav pom tej lo lus piav qhia txog Tswv Yexus tshwm los thiab saib xyuas Nws haiv neeg. Thaum noj puas mov kawg nyob rau hauv Mathais, Malakauss, Lukas, Tswv Yexus zoo li Tus menyuam yaj raug fij (nyob hauv Kevcai hla dhau) hloov peb txhua tus tej kev txhaum. Peb tau ntuas txog zaj xwm txheej nyob hauv phau Khiavdim dhau ntawm Tswv Yexus tej lus qhia txog cov mov cawm txojisa. Txhua tes haujlwm uas Tswv Yexus ua nws muaj kev sib txuas mus rau ntawm Vajtswv txoj kev hlob tshua txog Vajtswv haiv neeg uas Vajtswv cog lus nrog lawv, pub mov rau lawv noj txawm yog lawv tabtom nyob rau tom tiaj suab puam. Thaum pub mov rau cov pej xeeb noj, thaum muab puas mov faib rau sawv daws noj yog lub cim qhia txog Tswv Yexus txojkev khuvleej rau cov neeg uas raws Nws qab thiab mloog Nws qhia. Tom qab, Tswv Yexus sawv rov qab los, Tswv Yexus kuj ua li no ntxiv rau Nws cov thwjtim thiab rau tus uas ntseeg Nws. Pawg Ntseeg

thaum xub thawj hauv phau Tes Haujlwm kuj coj li no nyob rau hauv pawg ntseeg, pawg ntseeg nco txog thaum lawv sib ntsib txhua kiab thiab muaj kev nco txog Tswv Yexus txoj kev saib xyuas, kev tuag, kev sib raug zoo uas Tus Tswv tau ua rau txhua hom neeg thaum lawv tuaj nyob puag ncig ntawm tus Tswv thiab Nws faib mov rau sawv daws noj.

Cov Npe Hu Txog Tswv Yexus Rooj Mov

Nyob ntawm txhua pawg ntseeg sib txawv kuj siv ntau lub npe sib txawv los hu txog *Rooj Mov dawb huv*: Rooj Mov Dawb huv (*Eucharist*), Tus Tswv Rooj Mov Sib Ncaim (*Lord's Supper*), Rooj Mov Dawb Huv Sib Raug Zoo (*Holy Communion*). Txawm yog muaj ntau lub npe hu los, peb lub npe no tau koom haum Giám Lý Liên Hiệp siv ntau dua. Ib lub npe yeej muaj ib lub hauv paus los ntawm Vajluskub tshiab thiab ntawm Pawg Ntseeg thaum xub thawj los.

Muaj qee lub koom haum piav lub ntsiab ntawm rooj mov no zoo li ib Rooj Kevcai Dawb Huv (*sacrament*), muaj qee lub koom haum ho hu tias Rooj Kevcai Coj (*ordinance*). (*THM*, “Rooj Kevcai Dawb Huv cov npe hu,” 3-4.) Nyob ntawm peb cov ntseeg Methodist, peb totaub tias Tswv Yexus rooj mov yog ib Rooj Kevcai Dawb Huv (lub cim txog kev hlub tshua). Tswv Yexus Rooj Mov thiav Kevcai Raus Dej yog ib txoj kev coj Vajtsvv los ntsib tau peb, ua haujlwm hauv peb lub neej, pab thiab txhawb peb los ntawm txoj kev khuvleej thiab kev hlub. Cov Kevcai Dawb Huv (lub

cim kev hlub) yog “tej lub cim qhia txog Vajtsvv lub siab zoo thiab nplooj siab hlub tseg rau peb.” Nyob rau hauv cov Kevcai Dawb Huv, “Vajtsvv ua haujlwm hauv peb tus kheej, kom muaj zog, tau txhawb zog thiab



muaj kev ntseeg ruaj khov.” (*Koom Haum Methodist Txoj Kevcai*– 2012 (Nashville: the United Methodist Publishing House, 2012), Nqe 104, nplooj ntawv 67 thiab 72.)

Lo lus *Kevcai Dawb Huv* (*sacrament*) yog ib lo lus muaj hauv paus los ntawm cov lus Latees los, nws muaj lub ntsiab tias *Cog lus*. Nyob rau hauv rooj Rooj Mov Dawb Huv, yog hais txog Vajtswv tau cog lus Nws yuav tshwm los rau hauv peb lub neej txhua lub sijhawm. Rooj Mov Dawb Huv yog qhia txog Vajtswv txojkev cog lus rau Vajtswv Pawg Ntseeg thiab yog lub cim qhia txog Vajtswv txojkev hlub uas peb tib neeg paub tsis tag uas Vajtswv twb muab pub rau tib neeg ntiajteb. (*THM*, “Kawm Txog Cov Cim Kev Hlub” (*The Theology of Sacraments*), 7).

Lo lus Kevcai ho txawv, Kevcai yog ib lo lus sam hwm, lossis ib txojcai. Thaum peb hais txog rooj mov dawv huv zoo li ib txojcai, twb yog peb tabtom hais tias peb koom mus noj rooj mov ntawd kom nqes tes ua raws li Tswv Yexus tej lus sam hwm uas hais tias peb “yuav tsum ua li no” kom nco ntsoov Kuv.

Yog peb nkag siab rooj mov zoo li ib Rooj Kevcai Dawb Huv ces txhais tau hais tias peb tabtom saib qhov uas Vajtswv ua haujlwm rau hauv peb tus kheej dhau ntawm rooj mov ntawd yog yam tseem ceeb dua. Qhov uas peb nkag siab li ntawd yog peb saib Vajtswv txoj kev hlub uas muab pub rau peb yog qhov khoom plig uas tseem ceeb tshaj. Yog hais tias peb nkag siab rooj mov ntawd yog ib txoj kev cai coj ces txhais tau hais tias peb saib qhov uas peb mloog lus yog qhov uas tseem ceeb. Qhov uas peb nkag siab li no muaj lub ntsiab lus ntuas peb yuav tsum teb tus Tswv txoj kev hlub thiab Nws tej lus sam hwm dhau ntawd kev mloog lus. (*Cov ntsiab lus tseeb hauv John Wesley tej zaj qhuab qhia*). Peb yog cov ntseeg Giám Lý Liên Hiệp (Cov ntseeg Kevcai Dawbhuv), peb xaiv yuav qhov uas qhia tias Rooj Kevcai dawb huv yog Vajtswv txoj kev hlub tshwm los ua haujlwm hauv peb txhua tus lub neej ntau dua, thiab no yog Rooj mov Dawb huv tus cwj pwm. Peb txoj kev mloog lus thiab nqes tes ua haujlwm yeej mus ua qab Vajtswv txojkev nqes tes ua haujlwm hauv peb lub neej.

Lo lus *Rooj Mov Dawb Huv* (*Eucharist*) yog los ntawm ib lo lus Kilis muaj lub ntsiab tias *Ua tsaug*. (*THM*, “Kevcai Dawbhuv cov npe hu,” 4.). Nyob hauv zaj xwm txog puas mov saum chav tsev siab, lossis zaj xwm txog

Tswv Yexus pub mov rau cov pej xeem coob coob noj, Vajluskub sau tias Tswv Yexus nqes tes muab ncuav, thov foom koob hmoov lossis ua tsaug, muab ntais, thiab pub rau. Hauv Mathais 26:26-27 thiab Malakaus 14:22-23, Tswv Yexus foom koob hmoov rau cov ncuav thiab ua tsaug rau khob kua. Thaum hu rooj mov tias Rooj Mov Dawb huv (Eucharrist) yog pab kom peb nco ntsoov tias thaum Tswv Yexus tabtom ntais ncuab faib thiab muab khob kua faib rau sawv daws, Tswv Yexus twb ua Vajtswv tsaug txog Vajtswv txojkev cawm dim tseg rau tib neeg ntiajteb. Qhov no kuj qhia nyav txog kev qhuas thiab kev ua tsaug uas peb muab fij pub rau Vajtswv nyob rau hauv peb lo lus thov ntawm tus Tswv rooj mov thiab nyob rau lub sijhawm faib ncuav thiab khob.

Txhua lub sijhawm uas peb siv lo lus *Tswv Yexus Pluas Hmo (Lord's Supper)*, txhais tau tias peb tabtom hais los ntawm Paulus tej lus qhia txog rooj mov nyob hauv 1 Kauleethaus 11. (*THM*, “Kevcai Dawbhuv cov npe hu,” 3). Nyob hauv tshooj Vajluskub no Paulus yuam kom pawg ntseeg yuav tsum ris lawv lub txim txog qhov uas lawv muab rooj mov coj tsis yog kev. Pawg ntseeg Kauleethaus twb ua rau cov ntseeg muaj kev sib faib, tsis sib haum, tsis sib npaug zog. Muaj ib txhia neeg tuaj ntsov, thiab noj ua ntej ua rau cov tuaj tom qab tsis muaj txaus noj thiab tshaib plab (1 Kauleethaus 11:17-22). Nyob rau ntawm Paulus pom, pawg ntseeg ua li no twb yog mus tsis raws li lub ntsiab ntawm Tswv Yexus pluas hmo (pluas mov no yuav tsum yog tagnrho cov ntseeg uas koom Tswv Yexus lub cev uas yog pawg ntseeg los koom ua ke noj.)

Hnov kub siab lug thaum ntseeg tias rooj mov dawb huv ntawd yog pawg ntseeg li feem. Tiamsis, Paulus cov lus ceeb toom rau pawg ntseeg yog hais tias, ntawm no tsis yog pluas mov dawb huv uas cov ntseeg mus caw lwm tus los noj tiamsis yog Tswv Yexus rooj mov—Tswv Yexus Pluas Hmo—thiab nyob rau ntawd peb yog cov tau caw tuaj noj. Txhais tau hais tias, peb tsis yog tus kav pluas mov ntawd; tiamsis Tswv Yexus thiaj yog tus tswv ntawm pluas mov ntawd. Tus Tswv caw peb tuaj koom Nws rooj mov kom peb muaj cuab kav koom nrog Nws thiab koom nrog lwm tus ua ke nyob ib ncig ntawm Tus Tswv rooj mov.

Lo lus thib peb tau siv ntau rau Tswv Yexus Rooj Mov yog *Kevcai Dawb Huv Sib Raug zoo (Holy Communion)*. (*THM*, “Kevcai Dawb huv cov npe hu,” 4). Lo lus no qhia tias thaum peb koom noj Tswv Yexus rooj mov,

peb tau nrog Tswv Yexus sib raug zoo thiab nrog lwm tus muaj kev sib raug zoo. Thaum Paulus ntuas txog tej uas pawg ntseeg Kauleethaus ua tsis tau, nws nqua hu lawv kom thaum lawv nrog Tus Tswv muaj kev sib raug zoo ces pawg ntseeg ib tug kuj yuav tsum muaj kev sib raug zoo nrog ib tug. Cov ntseeg Kauleethaus twb ua poob qhov no thaum lawv tsis pom tau tias Tswv Yexus lub cev yuav tshwm sim los rau hauv pawg ntseeg thaum lawv noj haus ua ke ntawm rooj mov. Yog li, dhau lub sijhawm uas sib faib ncuav thiab khob ua ke rau ntawm rooj mov thaum cov ntseeg los koom ua ke, ces ntawd kuj yog lub sijhawm peb tau muaj kev sib raug zoo nrog Vajtswv dhau ntawm Tswv Yexus Khetos thiab kuj los koom muaj kev sib raug zoo nrog lwm tus ua ke thiab. Nyob hauv rooj Kevcai Dawb huv Sib Raug Zoo, qhov uas peb ua Vajtswv tsaug thiab koom noj Tus Tswv Pluas Hmo yuav dhau los ua txoj kev coj peb mus ua tiav ob nqe kevcai loj yog *Hwm Vajtswv* thiab *Hlub lwm tus*.

Txhua zaus uas peb muab rooj mov ntawd hu ua *Rooj mov dawb huv* (Eucharist), twb yog peb nco txog Tswv Yexus tej lus ua Vaj Leejtxiv tsaug thaum Nws nrog cov thwjtim koom noj rooj mov ntawd. Nyob rau hauv Rooj mov dawb huv, peb kuj fij lo lus txhawb nqa thiab ua tsaug pub rau Vajtswv. Peb tsis yog tsuas ua Vajtswv tsaug txog cov ncuav thiab khob (yog piv txog Khetos txoj kev tuag, kev ciaj sia sawv hauv qhov tuag rov qab los) xwb tiamsis peb tseem ua Vajtswv tsaug txog txhua yam uas Vajtswv twb tau ua thiab tseem yuav ua ntiv mus yav tom ntej kom cawm tib neeg ntiajteb.

Txhua zaus uas peb muab rooj mov ntawd hu ua *Tswv Yexus Pluas Hmo* (Lord's Supper), ces yog peb tabtom tsom ntsoov rau ntawm Tus Tswv Yexus uas yog Tus caw peb los noj puas mov ntawd, yog tus Vajtswv uas pub cov ncuav cawm txoj sia thiab pub lub khob cawm dim rau peb.

Txhua zaus uas peb muab rooj mov ntawd hu ua rooj *Kevcai Dawb Huv Sib Raug Zoo* (Holy Communion), ces yog peb hais qhia tawm tej yam uas peb txais tau ntawm lub rooj mov ntawd: Peb tau coj nkag mus koom rooj mov ua ke thiab tau muaj kev txhawb zog los ntawm txoj kev sib raug zoo nrog Vajtswv thiab lwm tus.

Vajtswv Txojlus Thiab Rooj Mov Dawb Huv

Peb nrhiav pom txhua txoj kevcai txog Rooj mov Dawb huv nyob rau hauv Vajtswv txojlus thiab ntawm Tus Tswv rooj mov (Word and Table). Tus qauv ntawm no tau nrhiav pom nyob rau hauv zaj xwm hais txog ob tug thwjtim uas taug kev mus ntawm lub zog Ema-u hauv Lukas 24:13-35. Thaum taug kev mus ntawm lub zog Ema-u, cov thwjtim tau koom nrog tus Tswv uas sawv hauv qhov tuag rov qab los. Tswv Yexus txhais Vajtswv txojlus rau lawv thiab nrog lawv noj mov ua ke. Kiang lub sijhawm uas Tswv Yexus ntais ncuav ua tsaug thiab faib ncuav, cov thwjtim lub qhov muag tau qhib pom kev thiab cim tau tus Tswv Yexus. Tom qab, lawv rov qab mus rau nram Yeluxalees, tshaj tawm txoj moo zoo uas hais txog Tus Tswv Yexus twb sawv hauv qhov tuag rov qab los ciah sia lawm.

Txoj cai hais txog cov lus sib quas (yog Vajtswv txoj lus) nrog kev ua tsaug thiab kev sib raug zoo (ntawm Vajtswv lub rooj) yog ua ib tug qauv qhia txog Koom Haum Giám Lý Liên Hiệp txoj kev pehawm Vajtswv niaj hnub nim no. Txoj kev cai no ua piv txwv hais tias Vajtswv txojlus uas tau tshaj tawm nyob rau hauv txhua zaj nyeem Vajluskub thiab zaj qhuab qhia hauv lub sijhawm pehawm kuj yog Vajtswv txojlus tau tshaj tawm ntawm Vajtswv lub rooj. Txojkev coj li no kuj ua piv txwv hais tias Vajtswv txojlus uas tau tshaj tawm lub rooj rau lub sijhawm faib ncuab thiab khob kuj yog Vajtswv txojlus uas tau muab faib tawm lub sijhawm uas nyeem thiab qhuab qhia. Txhais tau hais tias, txoj kev coj li no qhia tawm hais tias Vajtswv txojlus thiab Vajtswv lub rooj dawb huv muaj kev sib raug zoo ua ke tsis faib cais. Peb yuav ua tsis tiav lub rooj pehawm Vajtswv yog tias muaj tsis txaus ob yam no. Tus qauv ntawm txoj kev cai no kuj pab rau pawg ntseeg muaj ib tug qauv zoo ua hauv paus txog kev pehawm Vajtswv, txawm tias nws kuj tau siv sib txawv nyob rau hauv txhua lub pawg ntseeg.

Nyob rau hauv tus duab qhia txog Vajtswv txojlus thiab Vajtswv lub rooj ntawm no, muaj plaub ntu uas peb pom nyob rau hauv txhua zaj xwm txheej hais txog txhua pluas mov uas Tswv Yexus tau koom nrog nws cov thwjtim: Tswv Yexus 1) muab ncuav thiab khob 2) txhawb nqa Vajtswv lossis ua Vajtswv tsaug 3) ntais ncuav thiab laub kua txiv hmab rau hauv lub khob, thia 4) muab cev rau cov thwjtim.



Dhau los ntau tiam, Pawg Ntseeg kuj totaub txog Tswv Yexus lo lus sam hwm: “ua li no” tsis yog tsuas hais txog qhov uas ntais faib ncuav thiab lub khob xwb tiamsis tseem yog hais txog qhov uas txais yuav thiab ua Vajtswv tsaug txog txhua yam uas Pawg Ntseeg twb tau txais thiab yuav tau txais ntxiv ntawm Vajtswv mus rau yav tom ntej nyob rau hauv Vajtswv txoj kev tsim txhua yam, kev cawm dim, kev ntxuav kom dawb huv.

Nyob rau hauv ntu uas txais thiab ua tsaug (thanksgiving) peb npaj Vajtswv lub rooj thiab npaj siab faib Vajtswv qhov khoom plig uas Nws muab pub rau peb nyob rau hauv Tswv Yexus Khetos. Ntawm no, yooj yim yog totaub hais tias peb npaj ib rooj noj zoo li txhua pluas noj uas peb pheej npaj. Ib yam ntxiv, ntawm no kuj yog npaj peb lub siab thiab peb lub paj hlwb kom peb pau tseeb tias muaj Khetos tshwm los nrog peb lub sijhawm uas peb noj ncuav thiab haus lub khob ua ke.

Nyob rau ntu faib ncuav (communion), peb muab ncuav ntais thiab faib rau sawv daws. Qhov ntawd qhia peb cim nco tias thaum lub sijhawm Tswv Yexus ntais thiab faib ncuav yog qhia txog nws muab nws lub cev tau tawg vim peb tib neeg ntiajteb, Tswv Yexus muab tagnrho nws lub cev uas tawg tag ntawd fij los kho peb thiab lub ntiajteb no.

Nyob hauv ntu ua tsaug (Thanksgiving) thiab sib raug zoo (Communion) peb koom ua ke npaj rooj mov thiab pab sawv daws tau los koom rooj mov ua ke. Peb kuj koom ua ke ua Vajtswv tsaug, qhov no ntuas peb nco ntsoov txog tej yam uas Vajtswv tau ua pub rau peb lub nee. Thaum peb

ua li ntawd, twb yog peb los koom kev sib raug zoo ua ke thiab koom nrog Vajtswv, Vajtswv kuj nqua hu peb txhua hnuv yuav tsum ntais faib peb cov ncuav mus pub rau cov neeg txomnyem nyob ib ncig peb thiab.

Kevcai Txhawb Nqa Ua Tsaug (*The Great Thanksgiving*)

Lo lus thov ua Vajtswv tsaug nyob rau ntawm Tswv Yexus lub rooj mov tau hu hais tias Kevcai txhawb nqa ua tsaug lossis zaj nyeem txog Rooj Mov dawb huv (Eucharistic Prayer).

Kevcai txhawb nqa ua tsaug qhia tawm peb kev paub txog Vajtswv Vaj Peb leeg. Tagnrho lub sijhawm thov Vajtswv yog cov lus ua tsaug fij mus rau ntawm Vajtswv. Yog kev nco txog tej yam uas Vajtswv tau ua nyob rau hauv Tswv Yexus Khetos thiab Vaj Ntsujplig tej lus thov rau ntawm lub ncuav thiab lub khob thaum lub sijhawm uas tagnrho sawv daws los koom ua ke puag ncig ntawm lub rooj.



Vajtswv Vaj Peb Leeg pab rau pawg ntseeg muaj sijhawm ua Vajtswv tsaug, nco txog Tswv Yexus Khetos, thiab thov Vaj Ntsujplig, qhov uas pab rau pawg ntseeg muaj kev sib raug zoo ua ke nrog Yexus Khetos thiab muaj kev sib raug zoo nrog lub ntiajtec. Pluas mov noj no kuj ntuas peb nco ntsoov tias peb yuav tau txais Tswv Yexus pluas mov uas zoo tshaj plaws nyob saum lub Ntuj Ceeb Tsheej.

Txheej Txheem Tswv Yexus rooj mov muaj tsib qib tseem li no:

1. Pib cov lus sib quas.
2. Lus ua Vajtswv tsaug
3. Kev nco txog Tswv Yexus Khetos
4. Lus thov rau ntawm Vaj Ntsujplig
5. Xaus – lus txhawb nqa

Pib Lus Sib Quas

Kevcai txhawb nqa ua tsaug pib los ntawm cov lus sib quas ntawm tus xibfwb thiab cov ntseeg:

Thov Vajtswv nrog nraim nej sawv daws.

Thiab nyob nrog nraim xibfwb.

Nej sawv daws cia li tig nej lub siab los rau ntawm Vajtswv.

Peb tabtom cia siab mus rau ntawm Vajtswv.

Peb cia li ua Vajtswv tsaug uas yog peb tus Vajtswv.

Tseeb tiag, Vajtswv tsim nyog rau peb txhawb nqa thiab ua nws tsaug.

Cov lus sib quas saum no muaj ob peb lub ntsiab lus li no. Nws pib los ntawm cov lus hais nyob zoo rau ntawm tus xibfwb thiab cov ntseeg, nyob rau hauv, peb tau muaj feem caw Vajtswv los kav peb lub siab thiab foom koob hmoov rau peb nyob rau lub sijhawm uas peb los koom ua kev ntawm tus Tswv rooj mov. Lo lus sib quas txuas ntxiv coj peb mus rau qhov uas peb yuav tau npaj peb lub siab. Peb siv tagnrho peb lub siab thiab peb lub hlwb los rau siab ntso rau ntawm txoj kev hlub uas peb hlub Vajtswv. Feem kawg ntawm cov lus sib quas nws tseem ceeb heev vim cov lus ntawd ntuas kom peb nco ntsoov tias tus xibfwb tsis yog fij khoom rau nws tib leeg xwb tiamsis yog fij rau tagnrho cov ntseeg sawv daws.

Ua Vajtswv Tsaug

Ntu thib ob yog cov lus thov meej meej rau ntawm Vaj LeejTxiv dhau ntawm cov lus ua Vajtswv tsaug. Ntawm no yog peb nco txog txhua yam yav tag los uas Vajtswv tau ua kom cawm peb dim. Tshwj xeeb yog nco txog Vajtswv yog tus tsim muaj lub ntuj thiab lub ntiajteb, tus muaj tej lus cog tseg zoo thiab yog tus muaj kev hlub mus ib txhis tsis hloov, txawm yog tib neeg tau ua txhaum thiab tsis ncaj ncees los Vajtswv tseem cawm nws haiv neeg dim ntawm txojkev mus ua cev qhev, saib xyuas thiab tu Nws haiv neeg dhau los ntawm cov xibfwb cev lus. Cov lus no xaus los

ntawm ib zaj nkauj txhawb nqa lossis hu tias ib zaj lus txhawb nqa tau tagnrho cov ntseeg hais tawm ua ke: “Vajtswv tus uas dawb huv, dawb huv, dawb huv, Vajtswv tus muaj lub zog loj thiab yog tus muaj hwjchim...” Zaj nkauj qhuas no tau muab los ntawm tus timtswv ceeb tsheej zaj nkauj tau hu ntawm Vajtswv lub zwm txwv uas tau sau tseg rau hauv Yaxayas 6. Zaj nkauj kuj tau muab sau los ntawm Phau Ntawv Nkauj 118:26 yog tej lus taw qhia txog kev cai sib hu nyob zoo hauv ib pab pawg, kuj yog hais txog haiv neeg coob coob tau txais tos Tswv Yexus mus rau hauv lub nrog Yeluxalees (Mathais 21:9; Malakaus 11:9). Yog peb ib zaj nkauj txhawb nqa hu nrog cov tim tswv txhawb nqa Vajtswv ua ke.

Kev Nco Txog

Ntu thib peb ntawm cov lus thov yog nqua hu peb mus koom ua Tswv Yexus tes haujlwm ua ke, thiab kuj yog koom haum tes haujlwm. Nyob rau ntawm ntu no, pawg ntseeg nco txog txojmoo zoo uas Tswv Yexus tau tso peb dim, pub txoj kev ywj pheej rau peb thiab kho peb zoo. (Cov lus no tau txhais lub ntsiab los ntawm Yaxayas 61:1 thiab Lukas 4:18-19). Peb nco ntsoov tias thaum peb tabtom ua lub neej nyob rau hauv txoj kev txomnyem ces Tswv Yexus twb los tuag, sawv rov qab los thiab muaj hwjchim cawm peb dim ntawm txoj kev txhaum, kev tuag thiab tau txais ib lub neej tshiab yog lub neej muaj kev ywj pheej nyob hauv peb tus Tswv. Lub ntsiab lus no qhia tawm txog cov ntseeg Giám Lý tes dejnum loj uas yog cog lus txiav txim siab yuav ua dej num pub rau lub ntiajteb no. Ntu no kuj qhia txog tej lub ntsiab lus loj hauv ib lub xyoo ntawm Pawg Ntseeg (church year), xws li Tswv Yexus tau yug los hauv ib lub dab zaub pluas txomnyem (Koob tsheej Yexus yug) lossis plaub caug hnuv nyob tom roob moj sab qhua (Caij Noj Tsuag). Thaum nco txog txhua yam zoo muaj hwjchim uas Vajtswv tau ua pub rau peb dhau los ntawm Tswv Yexus Khetos thiab qhov uas Khetos cim civ fij Nws tus kheej los txhiv peb, peb kuj koom nrog Khetos thiab fij peb tus kheej los qhuas thiab ua Vajtswv tsaug. Ntu no xaus los ntawm ib co lus txhawb nqa luv luv siv rau pawg ntseeg, lossis hu nkauj qhuas ua ke, nyob rau hauv, peb qhia tawm leb lub siab ntseeg thiab peb txoj kev cia siab tias peb yog ib tug ntseeg Yexus: *“Tswv Yexus twb tau tuag; Tswv Yexus twb sawv rov qab los; Tswv Yexus yuav rov qab los!”*

Tej Lus Taij Thov

Ntu thib plaub yog tej lus taij thov kom Vaj Ntsujplig tshwm ntsej muag thiab pub hwjchim los hloov pauv cov ncuav thiab khob thiab hloov pauv tagnrho txhua tus ntseeg uas tabtom koom ua ib lub siab ntawm tus Tswv lub rooj. Dhau los ntawm Vaj Ntsujplig lub hwjchim, ncuav thiab khob dhau los yog Khetos lub cev thiab cov ntshav muab pub rau peb kom peb kuj dhau mus yog Khetos lub cev muab pub mus rau lub ntiajteb. Peb tau koom ua ib nrog Khetos thiab nrog sawv daws ua ke los ntawm Vajtswv txoj kev hlub thiab Vajtswv lub hwjchim, dhau ntawd peb tes haujlwm yog yuav tsum tshaj tawm Txojmoo Zoo thiab tshaj tawm Vajtswv txojkev hlub mus rau tagnrho lub ntiajteb no tau hnov.

Txhawb Nqa

Ntu thib tsib kuj yog ntu kawg, ntawm no yog ib zaj nkauj txhawb nqa xaus ua ke lossis yog ib zaj nkauj qhuas, los xaus ntu Kevcai Txhawb Nqa – Ua tsaug zoo li thaum pib. Lo lus thov xaus los ntawm ib zaj lus qhuas thiab ua Vajtswv Vaj Peb Leeg tsaug: Leejtxiv, Leejtub, thiab Ntsujplig. Peb xaus peb lo lus thov Vajtswv dhau los ntawm cov lus txhawb nqa Vajtswv, qhuas Vajtswv thiab fij lub koob meej pub rau Vajtswv. Pawg ntseeg teb los ntawm lo lus tias: “Amees!” nrov nrov ua ke. Dhau ntawd twb yog peb ntseeg ruaj siab tias txhua lo lus uas peb tau thov tagnrho |twb yog peb tej lus thov tiag tiag. Lo lus teb “Amees” yog koom haum lo lus teb tias, “Yog, ntawm no yog peb tej lus thov.”

Cov Lus Nug Txog Kevcai Txhawb Nqa Ua Tsaug

N: *Peb tsis muaj txaus sijhawm los koj tagnrho raws li zaj lus taw qhia ua kevcai noj Tswv Yexus rooj mov. Yog li, puas muaj dua lwm zaj uas luv dua es peb yuav siv tau?*

T: *Txhua tus xibfwb thiab tagnrho peb sawv daws cuag li leej twg los twb hnov ris lub nra uas hais tias yuav tsum ua txhua yam kom ceev*

dua, kom zoo dua. Txawm li ntawd los, raws li Phau Ua Neej Nyob Hauv Kev Xav Tsis Thoob tau taw qhia, lub sijhawm nws tsi yog qhov teeb meem “loj dua txoj kev hlub pub dawb thiab txoj kev khuvleej nyob rau hauv txoj kev cai noj tus Tswv rooj mov.” Nyob rau hauv ntu “Vajtswv txojlus thiab Vajtswv lub Rooj III” (The Service of Word and Table III) hauv Pawg ntseeg Giám Lý phau nkauj muaj cov lus xibfwb sau tseg cia peb tau xaiv. (Txawm li ntawd los, kuj nco tias ntawm no tsis yog ib zaj kevcai luv). Dhau ntawd, zaj no pab pww ib co lus kom pawg ntseeg muaj feem coj raws li. Cov lus no luv me ntsis, txawm li los nws yeej yuav tsum muaj txaus ntu phib thawj, ntu ua tsaug thiab nco txog tej uas Vajtswv tau ua nyob rau hauv txoj kev cawm dim dhau ntawm Tswv Yexus Khetos, thaj chaw tus Tswv noj nws rooj mov, tej lus thov hais rau ntawm Vaj Ntsujplig tes haujlwm, thiab xaus los ntawm cov lus txhawb nqa Vajtswv Vaj Peb Leeg. Txawm li ntawd los, raws li Hoyt Hickman twb tau hais nyob hauv phau Pawg Ntseeg Giám Lý Kevcai Pehawm (The Worship Resources of The United Methodist Hymnal), yog cov xibfwb siv ntu “Vajtswv txojlus thiab Vajtswv Lub Rooj” ces yuav tsum tau ceev faj thiab npaj kom zoo rooj Kevcai Ua tsaug vim rau qhov tej no yuav coj pawg ntseeg mus rau qhov uas totaub nkag siab txog Vajtswv lub hwjchim tau ua dhau ntawm Tswv Yexus Khetos thiab lub ntsiab lus ntawm tus Tswv rooj mov. Feem kawg, txhua tus Txwj laug, xibfwb thiab pab pawg tau nqua hu siv ntu Vajtswv txojlus thiab Tus Tswv lub rooj hauv phau Ntawv Nkauj thiab Pehawm. Qhov uas siv phau ntawv no mus raws li yus pawg ntseeg pom zoo ua rau pawg ntseeg paub coj li cas kom coj tau kev koom siab ntawm txhua tus ntseeg los ua ke thiab txhua tus los ua haujlwm ua ke.

N: *Thaum twg tus xibfwb muaj feem ntais ncuav ua ntej – ntais mus raws li Tswv Yexus tej lus hais txog ncuav, lossis tom qab? Vim li cas?*

T: Hauv pawg ntseeg Giám Lý Liên Hiệp phau ntawv nkauj (nplooj ntawv 11) thiab hauv Pawg ntseeg Giám Lý Liên Hiệp phau Kev Pehawm (npl.37-39) taw qhia hais tias lub ncuav tau muab ntais tom qab ua kevcai Txhawb nqa ua tsaug thiab tom qab zaj lus thov txoos.

Lub sijhawm no yog ua raws Vajtswv Txoj kevcai thiab ua haum hauv peb lub neej tiag. Ua raws Vajtswv Kevcai vim yog mus raws li koom

haum txoj kevcai tau qhia txog rooj mov uas twb tau muaj pab pww los ntawm txhua phau Moo zoo thiab phau 1 Kauleesthaus: txais ncuav, ua tsaug, muab ntais thiab cev pub. Nyob rau lub sijhawm coj noj rooj mov (cim daim ntaub npog ncuav thiab khob ua ntej lossis nqa ncuav thiab khob los tso rau ntawm lub rooj zoo ib yam li tabtom fij khoom) txhais tau hais tias peb tabtom “txais yuav” ncuav thiab khob. Thiab tom qab, peb foom koob hmoov zoo rau lub ncuav thiab khob thiab ua Vajtswv tsaug txog qhov khoom plig no nyob rau lub sijhawm Txhawb Nqa Ua Tsaug. Peb ntais lub ncuav kias tom qab uas hais lus ua tsaug tag thiab muab cev rau sawv daws. Peb tuav lub ncuav ua tsaug thiab ntais lub ncuav yog muab pub rau sawv daws.

Lub sijhawm ntais lub ncuav tom qab ua Kevcai Txhawb Nqa Ua Tsaug vim ua li no yuav pab rau peb tsom ntsoov mus rau hauv cov lus thov rau lub sijhawm ua Kevcai Txhawb Nqa Ua Tsaug dua li uas ntsia ntsoov rau tus xibfwb ua kevcai txhais tes.

Yam Dabtsi Twb Tau Tshwm Sim?

Dhau qhov uas peb faib ncuav thiab khob, peb saj tau tus Tswv Rooj Mov Dawb Huv, tsawg kawg nkaus yog muaj Vajtswv tshwm ntsej muag nrog peb thaum peb koom muaj kev sib raug zoo ua ke hauv Tswv Yexus Khetos. Lub ncuav thiab khob tau coj mus fij rau ntawm Vajtswv lub rooj, muaj lus ua tsaug, ntais ncuav thiab laub khob kua, thiab sawv daws koom sib faib ncuav noj ua ke nyob rau hauv rooj mov dawb huv no. (Peb nco hais tias, keeb kwm pawg ntseeg thaum ub lawv siv cawv los ua Tswv Yexus rooj mov). Txawm hais tias yeej tsis muaj ib txoj kevcai twg txwv tsis pub siv cawv, tiam sis pawg ntseeg Giám lý pheej siv cawv txiv hmab). Ntawm no yog tej uas peb tau ntsib dhau txog txoj kev sib raug zoo nrog Vajtswv thiab nrog lub ntiabteb dhau ntawm Tswv Yexus Khetos. Dhau ntawd peb pom tau Vajtswv txoj kev hlub uas ruaj khov, Nws txoj kev khuvleej thiab Nws nplooj siab hlub, txawm hais tias peb kuj tsis paub yuav txhais tej no tau tshwm muaj zoo li cas.

Qhov uas peb saj tau Vajtsv txoj kev hlub dhau ntawm tus Tswv rooj mov, dhau kev cai raus dej, nyeem Vajluskub, thov Vajtsv, kevcai yoo mov, thiab koom nrog cov ntseeg ua ke, ua rau cov ntseeg Giám lý dhau los ntseeg tias tej uas peb coj li no nws zoo li txoj kev nchuav tawm Vajtsv txoj kev hlub tshua uas tau muab pub dawb rau peb. Txhais tau hais tias, txawm yuav tsis muaj ib yam dabtsi txwv tau Vajtsv los cuag tau nrog peb los, ntawm no yog tej uas pawg ntseeg twb tau coj puas thaum chiv keeb los kom dhau ntawd txhua tus ntseeg txais tau Vajtsv txoj kev hlub.

Txawm muaj qee zaos peb yuav raug dag ntshias thiab xav tias tej no yog Vajtsv quab yuam peb coj, tiamsis John Wesley twb ua tib zoo ntuas cov ntseeg Giám lý tias qhov uas peb txais tau txojkev hlub pub dawb li no yog nyob txij ntawm Vajtsv qhov khoom plig pub thiab nyob txij ntawm peb lub siab txais yuav li cas xwb. Muab ua lwm lo lus hais, thaum Vajtsv tseem nqua hu peb tuaj koom rooj mov, ces qhov uas peb mus koom li cas rau hauv yog nyob txij ntawm peb lub siab txais yuav lo lus nqua hu ntawd.

Wesley ntseeg hais tias qhov uas koom noj Tswv Yexus rooj mov muaj ob qho zoo: Peb tej kev txhaum tau Vajtsv zam txim thiab peb tau txhawb zog kom peb ua tau ib lub neej ntseeg zoo. Txhua lub ntsiab lus hais txog kev zam txim thiab kev txhawb zog txuas ntshias mus kuj yog tej lub ntsiab lus tseem ceeb ntawm cov ntseeg Giám Lý Liên Hiệp niaj hnub nim no rau peb kev kawm paub txog Tswv Yexus rooj mov. Tiamsis peb pom hais tias, nyob rau hauv rooj kevcai Txhawb Nqa Ua Tsaug, cov ntsiab lus no muaj nyob rau hauv ob feem yog: ntawm tus kheej thiab sawv daws. Dhau rooj mov ntawd, peb tau nqug los ze lub neej uas muaj lub siab dawb siab zoo thiab coj lub neej zoo.

Peb tsis yog tsuas tau txais kev zam txim, kev muaj zog los rau peb tus kheej xwb, tiamsis peb tseem tau txais qhov khoom plig no los ntawm ib haiv neeg koom ib txoj kev ntseeg ua ke. Nyob rau hauv peb lo lus ua tsaug, peb nco ntsoov tias dhau keeb kwm los Vajtsv twb txuas nrog nws haiv neeg dhau los ntawm Nws tej lus zam txim thiab lub siab tshua txog Nws haiv neeg (Yaxayas 40:1-11).

Peb nco ntsoov tias, dhau los ntawm ib pab thwjtim, Tswv Yexus twb sib sau lawv los ua ke saum lub roob Kalilais thiab saum chav tsev siab thiab koom noj Nws rooj mov ua ke.

Peb kuj nco ntsoov tias, kuj yog pab thwjtim ntawd lawv ntshai heev thaum Tswv Yexus sawv hauv qhov tuag rov qab los (Yauhas 20:19-23) thiab kuj muaj ib pab neeg coob coob yog txhua haiv neeg nyob txhua lub tebchaws sib sau los koom ua ke ntawm lub nroog Yeluxalees nyob rau hnuv Vaj Ntsujplig nqes los (Tes Num 2:1-42) yog hnuv uas Vajtswv pub Vaj Ntsujplig uas yog lub hwjchim thiab yog kev zam txim. Txoj kev txhawb zog uas peb txais tau nyob hauv Rooj mov Dawb Huv kuj yog txoj kev txhawb zog uas tau muab pub rau pawg ntseeg sawv daws. Vaj Ntsujplig tau laub los rau peb dhau ntawm cov khoom plig uas yog ncuav thiab khob cawv thiaj kuj laub rau saum ib tsoom sawv daws uas tabtom koom ua ke ntawd, kom peb thiaj dhau los ua Khetos lub cev mus rau lub ntiajteb thiab kom peb thiaj dhau los muaj cuab kav ua dejnum thiab pab dej num rau lub ntiajteb.



Qhov Uas Khetos Tshwm Muag Tiag

Muaj ib lo lus nug txog Tswv Yexus rooj mov txij puas tiam pawg ntseeg nruab nrab thiab tiam pawg ntseeg tau hloov pauv los, yog nug txog Tswv Yexus khetos tau tshwm ntsej muag tiag li cas nyob rau hauv lub ncuav thiab lub khob. Cov lus teb rau lo lus nug no yog nyob txij rau ntawm cov ntaub ntawv pab pwv kev ntseeg nyob rau txhua tiam neeg.

Cov ntseeg koom nrog Wesley lees tias lo lus nug no nws tseem ceeb, tiamsis lawv muaj ib lo lus teb tshwm meej thiab tseeb muaj tiag dua li tej

lus tej raws ntaub ntawv. Lawv nqua hu kom ua tib zoo xam txog Vajtswv txoj kev hlub pub dawb nyob rau hauv Tswv Yexus uas tau qhia tawm ntawm tus Tswv rooj mov. Zaj nkauj “Txoj Kev Hlub Siab Thiab Tob Uas Xav Tsis Thooob” (O the Depth of Love Divine) uas tau Charles Wesley sau yog ib zaj lus qhia piav luv luv txog lub ntsiab lus thiab kuj yog ib lo lus teb rau cov ntseeg Gíám lý niaj hnuab nim no:

Oh! txoj kev hlub siab tob uas xav tsis thooob,
Kev hlub pub dawb uas suav tsis tag!
Leejtwg yuav hais tias ncuav thiab cawv uas
Vajtswv muab los rau peb yuav zoo li cas!
Ua li cas Tus Tswv lub cev thiaj qhia tau tawm dhau ntawm cov
ncuav, Ua li cas tus Tswv cov ntshav yuav tau qhia tawm dhau
ntawm cov cawv,
Laub kom puv Vajtswv haiv neeg lub siab ncaj ncees
Los ntawm tagnrho tus Tswv txoj sia!

Cia cov neeg uas muaj tswv yim qhia tawm
txoj kev hlub pub dawb uas peb tau txais nws zoo li cas;
cov neeg qaug zog zig twb tau pub
kom lawv muaj ib lub zog loj uas tsis yog lawv lub.
Leejtwg yuav txhais tau yam uas xav tsis thooob no,
ua li cas dhau tej ntawd tau qhia tawm,
txawm li cas los tej yam ntawd yeej tshwm muaj.

Ua li cas cov ntsuj plig saum ntuj thiaj yuav sawv taug rov qab los,
yog vim zaub mov ntiajteb yug lawv,
los yog vim dej cawm txoj siaj thiab mov cawm txoj sia?
Cia li nug txog Vajtswv txoj kev txawj ntse:
Khetos ua txoj kev;
cov tim tswv puag ncig peb lub rooj,
nyho hau tig nrhiav tiamsis tsis pom.

Tseeb tiag ntawd yog txoj kev hlub pub dawb,
txawm peb tsis paub nws txoj kev mus li cas;
Koj ntsib peb raws li Koj txoj kev
thiab hloov pauv kom peb koom los ua ib.
Tus Tswv, Thov pab kom peb saj tau Koj lub hwjchim saum ntuj,

peb yuav tsis thov yam twg ntxiv lawm,
thov kom tau koob hmoov,
tsuas muaj peb thiaj xav tsis thoob thiab txhawb nqa koj.

Zaj nkauj qhia tawm lub ntsiab lus tias, txawm yog peb tseem ua haujlwm ntxiv kom nkag siab txog qhov uas Tswv Yexus tshwm los rau ntawm lub rooj mov, tiamsis peb tsis tag yuav siv zog kom nkag siab tau meej meej txog txojkev uas Vajtswv siv los nthuav tawm Nws nplooj siab hlub pub rau peb. Peb tsuas nco ntsoov tias nyob rau hauv lub sijhawm faib ncuav thiab khob, peb twb saj tau Vajtswv txoj kev hlub tseg pub rau peb, Vajtswv txoj kev zam peb lub txim, kev tu zoo rau peb lub neej, thiab kev txhawb zog kom peb ua taus haujlwm pab rau lub ntiajteb.

Leej Twg Thiaj Muaj Cuab Kav Txais?

Cov ntseeg tiam xub thawj twb sau qhia rau hauv phau Vajluskub Tshiab ua tim khawv hais tias, txhua tus uas txais yuav Tswv Yexus Txojmoo zoo thiab pib lub neej tshiab nrog cov ntseeg Khetos dhau los ntawm ua Kevcai raus dej. Ntawm no tau dhau los ua ib lub qhov rooj mus rau hauv Pawg Ntseeg.

Tom qab uas mus koom nrog cov ntseeg dhau kevcai raus dej los ntawm Khetos txoj kev tuag thiab kev sawv rov qab los, lawv tau pawg ntseeg tu thiab saib xyuas dhau qhov “rau siab ntso mloog cov tubtxib qhia thiab koom ua ib lub siab sib raug zoo thiab koom noj Tswv Yexus rooj mov thiab thov Vajtswv ua ke” (Tēs Haujlwm 2:42). Pawg ntseeg thaum xub thawj qhia tawm txog kevcai raus dej thiab kevcai noj Tswv Yexus rooj mov nws zoo li qhov uas yug los thiab tau tu kom loj hlob tom qab tau yug los. Yog mus raws li no, qhov uas noj tus Tswv Rooj mov yog peb lees paub txog Vajtswv txoj kev zam txim thiab Vajtswv txoj kev hlub uas peb tau txais dhau los ntawm tus Tswv Yexus Khetos.

Dhau tagnrho keeb kwm ntawm Vajtswv pawg ntseeg, kevcai raus dej tau saib zoo li ib txoj kevcai yuav tsum ua ua ntej uas yuav los noj Tswv Yexus rooj mov. Dhau qhov uas tsuas pub cov uas ua kevcai raus dej los koom noj

rooj mov dawb huv, twb yog pawg ntseeg tabtom siv zog tuav txoj kev sib raug zoo dawb huv hauv pawg ntseeg. Txoj kevcai no kuj pib los ntawm kev kawm paub ntawm pawg ntseeg tias yuav tsum cob qhia tus ntseeg lub neej ua ntej uas tso cai rau tus ntawd los koom nrog sawv dawv ntawm Tus Tswv lub rooj mov...Tsis tag yuav hais, pawg ntseeg twb tsis thoojyim ib yam nkaus nyob rau ntawm txoj kevcai no, feem ntau pawg ntseeg thaum noj tswv Yexus rooj mov, ho txwv tsis pub cov menyuam uas twb tau ua kevcai raus dej lossis cov neeg uas twb ua kevcai raus dej tiamsis tsis mee pem lawm. Yog hais tias kev cai raus dej yog txoj cai yuav tau ua thiaj tau noj tus Tswv rooj mov, ces tus Tswv rooj mov yuav muaj cai kav tagnrho rau ntawm txhua tus uas twb tau ua kevcai raus dej, tsis hais txog hnub nyoog lossis tus kheej lub peev xwm.

Yog li Rooj Mov Dawb Huv nthuav dav (open Comunión) yog li cas? Nyob rau lub sijhawm xub thawj uas pab pawg Giám Lý tau tshwm muaj nyob rau teb chaws Anh Quốc, tau muaj tej teeb meem tshwm los rau kev kawm paub txog kev coj noj Tswv Yexus rooj mov nyob hauv cov tuam tsev. Ib yam ntxiv, feem ntau cov ntseeg yog cov uas tau ua kevcai raus dej puas thaum me nyob rau hauv pawg ntseeg Anh Quốc. Txawm hais tias lawv muaj cuab kav mus koom noj tus Tswv rooj mov tiamsis cov uas mus koom noj tsawg dua li cov uas tuaj pehawm. Twb yog vim li no, Wesley thiaj nqua hu thiab txhawb cov ntseeg Giám Lý mus koom noj Tswv Yexus rooj mov ntau dua yav tag los.

Ib sab ntxiv, Wesley tham tias kevcai Raus Dej tsis ua tau tim khawv qhia tias tus ntseeg ntawd yuav dawb huv los noj Tswv Yexus rooj mov. Kom teb tau lo lus no, Wesley thiaj nqua hu cov ntseeg Khetos yuav tsum tsim dheev rau lawv txoj kev ntseeg ntawm Khetos thiab txojkev yug dua tshiab los ntawm Vaj Ntsujplig lub hwjchim. Twb yog dhau los ntawm cov uas koom noj Tswv Yexus rooj mov lawv tau tsim dheev lawv txoj kev ntseeg thiaj ua rau Wesley to taub Tus Tswv rooj mov yog ib rooj kevcai hloov pauv thiab nqua hu tagnrho txhua tus uas xav ua ib lub neej tshiab nyob hauv Khetos lub npe ces tuaj rau ntawm Tus Tswv lub rooj mov dawb huv. Txawm li ntawd los, Wesley xam hais tias txhua tus uas twb tsim dheev lawv txoj kev ntseeg thiab tuaj koom noj Tswv Yexus rooj mov ces twb yog lawv twb ua kevcai raus dej lawm.

Ntawm no yog kev kawm pau txog Tswv Yexus rooj mov, kuj yog ib qho kev lees paub thiab kuj yog ib txoj kevcai coj cov ntseeg Giám Lý Liên Hiệp paub coj noj Tswv Yexus rooj mov nthuav dav mus. Tagnrho txhua tus uas xav ua lub neej thiab coj lub neej ntseeg Khetos, tsis faib cais hnub nyoog, kev txawj ntse lossis koom haum, puav leej tau nqua hu tuaj koom noj Tswv Yexus rooj mov dawb huv. (Kuj muaj tej lub tuam tsev lawv tsuas pub lawv cov ntseeg noj Tswv Yexus rooj mov xwb (Closed communion), txhais tau hais tias, tsuas pub cov uas nyob hauv lawv lub koom haum uas twb tau ua kevcai raus dej lawm thiaj tau noj xwb. Peb yog cov ntseeg Giám Lý yog tias peb ua qhua mus ncig xyuas txog cov pawg ntseeg ntawd, peb yuav tsum tau ceeb faj txog qhov no).

Niaj hnub nim no, nyob rau hauv ntau lub Pawg Ntseeg Giám Lý Liên Hiệp, lo lus nqua hu tuaj koom noj ntawm Tus Tswv lub rooj yog ib lo lus ceeb toom kom nco ntsoov tias Tswv Yexus twb faib nws pluas mov ntawd mus pub rau cov neeg uas muaj txim thiab cov uas tsis ncaj ncees. Peb kuj tau ceeb toom kom nco ntsoov tias rooj mov dawb huv uas peb tau caw tuaj noj ntawd tsis yog ib Pawg Ntseeg twg lossis ib lub koom haum twg li tiamsis yog Tswv Yexus Khetos rooj mov. Tseeb tiag yog Tswv Yexus Khetos caw peb tuaj koom noj Nws rooj mov.

Yog li, nyob ntawm peb, qhov teeb meem ntawm no yog kev ua lub siab dav npaj siab tuaj rau ntawm Tus Tswv lub rooj thiab tej kevcai nruj ntawm cov tuam tsev. Peb yeej tsis muaj ib zaus twg yuav tawm tsam cov uas tuaj koom noj tus Tswv rooj mov. Vim rau qhov yog ua li ntawd yuav mus tsis raws li Vajtswv txoj kev hluv pub dawb uas muaj pub rau peb. Ib yam ntxiv yog nyob hauv phau ntawv *Dej thiab Vaj Ntsujplig (By Water and the Spirit)*, zoo li cov lus tshaj tawm cov ntseeg Giám Lý txoj kev cai txog kev cai raus dej, tau sau li no:

Thaum ua kev cai noj Tswv Yexus rooj mov dawb huv, twb yog peb nco txog tus Tswv Txoj kev hluv pub dawb uas tau muab pub rau peb thaum ua kevcai raus dej thiab peb koom noj rooj mov dawb huv ntawm sab ntsuj plig yog kev cheem tsum rau peb thiaj coj tau cov lus cog tseg txog txojkev cawm dim mus ntxiv rau tom ntej... Tus uas tsis tau ua kevcai raus dej es nws twb noj Tswv Yexus rooj mov lawd, nws yuav tsum cheem tsum muaj tus taw qhia thiab coj nws kom mus txog qib uas tau ua kevcai raus dej yim ntxov yim zoo.

Qhov uas ua zoo li no nws zoo li ib qho khoom plig muab pub thiab yog kev txhawb zog kom tus ntawd txais tau kev ntseeg thiab kev hlub txog qib uas cog lub muab nws lub neej fij rau Tswv Yexus.

Cov Lus Nug Txog Leej Twg Thiab Muaj Cuab Kav Txais Noj

N: *Koj yuav tsum muaj pes tsawg xyoo? Koj puas tau ua kevcai Raus dej? Koj puas cheem tsum muaj npe nyob rau hauv ib lub pawg ntseeg thiab tsim nyog tau koom noj Tswv Yexus rooj mov?*

T: Koom haum Giám Lý Liên Hiệp tsis muaj txoj cai txwv tias pes tsawg xyoo thiab tau koom noj tus Tswv rooj mov: txoj kevcai no tau hais tawm meej meej nyob rau hauv phau ntawv: Koom Haum Giám Lý Liên Hiệp kev Pehawm thiab phau Dej thiab Vaj Ntsuj Plig, peb cov lus tshaj tawm meej meej li ntawd yog hais txog lub ntsiab ntawm kev nqes tes ua kevcai raus dej. Phau ntawv Pehawm sau tias: “tagnrho txhua tus uas xav coj lub neej ntseeg, nrog lawv tej menyuam, puav leej tau hu los koom noj ncuav thiab haus lub khob.” Phau Dej Thiab Vaj Ntsuj Plig kuj hais ib yam li ntawd: “Rau qhov rooj mov uas peb los koom ua ke ntawd yog tus Tswv li, vim li no rooj mov no yuav tau muab pub mus rau tagnrho txhua tus uas lees yuav Khetos txoj kev hlub, tsis suav txog lawv li hnuv nyoog lossis lawv lub pawg ntseeg.” Yog li ntawd, peb tes haujlwm yuav tsum tau ua yog, “pab txoj kev kawm thiab kev saib xyuas zoo mus qhia kom haum raws li lawv lub hnuv nyoog.

Lo lus nug txog kevcai raus dej nws zoo li ib qho yuav tsum muaj kom los koom tau tus Tswv Roj mov, phau *THM* kuj hais txog tej teeb meem tawm tsam ntawm kev txais tos txhua tus ntseeg thiab txoj kevcai hauv pawg ntseeg uas peb twb tau hais txog ua ntej ntawd: txhais tau tias, “txhua tus uas tsis tau ua kevcai raus dej yog tias lawv txais yuav peb lo lus caw thiab koom noj Roj Mov vim yog los ntawm lawv lub siab ntseeg ces peb muaj cai txais tos lawv tuaj koom. Ib yam ntxiv, Kevcai raus dej tsim nyog muaj ua ntej noj Tswv Yexus rooj mov. Tswv Yexus rooj mov dawb huv yog ib puas mov ntawm

haiv neeg uas ntseeg Yexus Khetos yog cov uas twb nyob rau hauv Vajtswv txoj kev cog lus tshiab.

Leej Twg Yog Tus Tsim Nyog Tau Noj?

Dhau qhov uas yuav noj Tswv Yexus rooj mov nqaim lossis nthuav dav, kev coj koom Tswv Yexus rooj mov li cas kom tsim nyog kuj yog ib qho uas pawg ntseeg sib tham txog puas thaum ub los. Qhov no tau pib los txij li thaum Koom Haum xav hais tias tsuas yog cov ntseeg dawb huv xwb thiaj tsim nyog tau txais ncuav thiab khob. Qhov uas peb xav paub txog tias puas tsim nyog tau txais kuj tau hais ntxiv nyob rau hauv “Lo lus thov txo hwjchim”, yog ib feem hauv kev pehawm ntawm Pawg ntseeg Giám Lý keeb kwm dhau los. Coob leej ntau tus ntseeg Giám Lý loj hlob los thiab hnov lo lus thov li no: peb yeej tsis tsim nyog tau txais tej nyuas nplais

ncuav uas poob ntawm tus Tswv lub rooj.” Lo lus no pheej npog lo lus tom qab, qhov no ntuas peb nco tias Vajtswv tseem ua siab ntev: “Tiamsis Nws kuj tseem yog Vajtswv, Tus uas muaj lub siab ntev ib txhis.”

Qhov uas xam tias yuav tsum tsim nyog thiaj tau txais noj kuj yog los ntawm txoj kev to taub yuam kev txog Paulus cov lus ceeb toom nyob hauv 1 Kauleesthaus 11:27-29:

²⁷Yog li ntawd, tus uas tsis hwm tus Tswv, nws cia li noj tus Tswv lub ncuav lossis haus tus Tswv lub khob, tus ntawd muaj txim, vim nws ua txhaum tus Tswv lub cev thiab tus Tswv cov ntshav. ²⁸Yog li ntawd, txhua tus yuav tsum ua tib zoo xav tso mam li noj lub ncuav thiab haus lub khob. ²⁹Rau qhov tus uas noj lub



ncuav no thiab haus lub khob no, yog nws tsis ua tib zoo xav txog tus Tswv lub cev, yog nws rov ua rau nws raug txim, vim qhov uas nwsnoj thiab haus ntawd.

Thaum sau tej no, Paulus hais txog qhov uas muab tus Tswv rooj mov coj yuam kev hauv pawg ntseeg Kauleesthaus, tsis yog hais txog ntawm tus kheej puas tsim nyog tau txais. Paulus cov lus ceeb toomn nqua hu kom peb yuav tsum tau ceev faj txog lub neej dawb huv tsis hais ntawm tus kheej tiamsis tseem yog ntawm pawg ntseeg sawv daws ua ke thiab. Paulus ntuas peb kom peb nco tias peb tabtom los koom ua ke, peb yog Tswv Yexus Khetos lub cev uas ciaj sia nyob hauv pawg ntseeg thiab nyob hauv lub ntiajteb.

Hauv zaj nkauj ntseeg “Cia li tuaj, txhua tus uas muaj txim, tuaj thiabnoj pluas mov moo zoo”, Charles Wesley hais txog txhua lo lus uas peb khuab xeeb tias yuav pub noj tswv Yexus rooj mov nthuav dav li cas thiab tej lus uas peb khuab xeeb txog tias yuav noj li cas thiaj tsim nyog.

Txhua tus uas muaj txim, cia li tuaj koom rooj mov moo zoo;
Cia li cia txhua tus ntsuj plig yog Tswv Yexus cov qhua.
Nej tsis tag yuav muab leejtwg tso tseg tom qab,
Rau qhov Vajtsv twb muab pub rau tagrho txhua tus.

Tsi txhob pib hais daws yus zaj;
Ab! Thov koj tsis txhob tsis lees yuav tus Tswv txoj kev hlub
nplua mias;
Thov tso tseg koj tej kev ntshaw ntiajteb,
Thiab cia li txais yuav tej uas Tswv Yexus muab pub rau koj.

Txawm peb yuav yog leejtwg los, Vajtsv nqua hu peb tus kheej tuaj koomnoj rooj mov moo zoo ntawd. Tswv Yexus nyob ntawd tos txais peb mus rau ntawm roojnoj. Lo lus nqua hu muab pub rau peb kom peb tau tus Tswv lees yuav peb.

Hov Ntev Coj Noj Ib Zaus?

Wesley cov pab pawg lawv kuj cim civ nkag siab tias lawv yog ib pab pawg sawv los hloov pauv kev tshaj moo zoo thiab tej Kevcai coj Dawb huv. Txawm li ntawd los, vim txoj kev sib raug zoo ntawm pab pawg Wesley thiab koom haum Anh Quốc giáo, nrog rau txoj kev loj hlob ntawm pab pawg Wesley xub thawj ntawm tebchaws Mekas, thiaj ua rau ob txoj kev (tshaj moo zoo thiab Kevcai Dawb huv) thiaj muaj ntau teeb meem. Dhau ntau txoj kev, cov ntseeg Giám Lý nyob sab qaum teb Mekas txhais ntau lub ntsiab txog kev noj Tswv Yexus rooj mov thiab txog qhov uas hov ntej coj noj ib zaus. Pawg Ntseeg thaum xub thawj, thiab cov xibfwb sawv kho txoj kev ntseeg (Martin Luther thiab John Calvin), ntshaw kom tus Tswv puas mov tau coj nyob rau txhua hnuv uas yog tus Tswv hnuv (Lord's day). Txawm li ntawd los, keeb kwm pawg ntseeg twb qhia rau peb paub tias muaj kev sib tawm tsam ntev heev nyob ntawm tej kevcai thiab kev nqes tes.

Nyob rau Wesley tiam, cov tuam tsev pem tej toj siab tsuas coj noj Tswv Yexus rooj mov peb lub hli ib zaus xwb. Cov tuam tsev nyob nram nroog ces coj tau ntau dua. Koom haum Anh Quốc txoj kab lis kevcai yuam kom cov ntseeg yuav tsum tau noj tsawg kawg yog ib xyoo ib zaus nyob rau lub koob tsheej Yexus sawv. Ib qho uas muaj kev tawm tsam rau txoj kev coj Tswv Yexus rooj mov ntau zaus twb yog vim qhov uas khuab xeeb tias yuav ua li cas kom tsim nyog tau txais (zoo li peb twb sib tham ua ntej ntawd) thiab qhov uas yuav tsum npaj tus kheej li cas kom los txais tau rooj mov dawb huv.

Twb yog li no thiaj ua rau Wesley muaj ib zaj lus qhuab qhia “Kev Koom Noj Tsis Tu Tes Haujlwm.” Wesley ntuas tias cov ntseeg tes haujlwm yog yuav tsum txais yuav Tswv Yexus rooj mov tsis tseg tsis tu yog tias coj tau. Wesley hais lus pab pww ntxiv hais tias Vajtsww tsis yog hu kom peb mloog lus tej lub sijhawm xwb tiamsis yog yuav tsum tau mloog lus tagnrho Vajtsww txhua txoj kevcai txhua txhua lub sijhawm. Nyob ntawm lo lus nug txog qhov uas tsim nyog thiab yuav tsum npaj kom haum, Wesley nqua hu txhua tus yuav tsum nco ntsoov npaj yus lub siab ua ntej. Tom qab, Wesley kuj ntuas kom peb nco tias Vajtsww ua txhua yam yog los ntawm Nws lub siab khuvleej txawm yog peb tsis tsim nyog tau txais.

Qhov uas pawg ntseeg thaum xub thawj tsis txhua koj noj Tswv Yexus rooj mov twb yog tsis muaj txaus cov xibfwb uas tau cai los koj noj Tswv Yexus rooj mov. Qhov no yog qhov uas cov ntseeg Mekas khuab xeeb txog lub neej dawb huv thiab twb yog li no thiaj txhawb kom Welsey txiav txim siab tso cai tsa xibfwb rau cov xibfwb Giám lý tshaj moo zoo. Wesley txhawb cov xibfwb uas twb tau tsa cai yuav tsum tau koj noj Tswv Yexus rooj mov nyob rau txhua hnuv uas yog Vajtswv hnuv.

Tswv Yexus rooj mov tsis tau koj noj ntau nyob rau hauv cov tuam tsev Giám lý tiam 19-20 twb yog vim ntau yam. Nyob rau yav pem toj siab yog tias cov xibfwb tau tsa cai mus koj Tswv Yexus rooj mov rau txhua qhov yog ib yam uas tsis yooj yim. Muaj qee tus pom tau tias, yog koj noj txhua lub sijhawm yuav ua rau sawv daws hnov swm dhau heev lawm thiab yuav tsis muaj kev tu zoo rau ntawm txhua tus tus kheej. Nyob ntawm cov rooj txhawb siab sab laj tiam 19, lawv hloov qhov uas tshaj moo zoo thiab txais yuav Tswv Yexus los rau qhov uas ua kevcai raus dej thiab noj Tus Tswv rooj mov kiag tom qab. Txawm li los, vim txhua lub tuam tsev Mekas nyob rau tiam xub thawj twb tshua txog qhov uas lwm haiv neeg tau hloov pauv kev ntseeg ntau dua, yog li thaum kawg, lawv thiaj tsis txhua quav ntsej txog qhov uas yuav tsum lees yuav thiab kho yus txoj kev ntseeg dhau los ntawm Tswv Yexus rooj mov. Nyob rau peb tiam niaj hnuv nim no, peb txoj kev tshua txog twb ntau tuaj lawm, dhau los ntawm kev koj koom noj rooj mov, txog ntawm txhua tus ntseeg yuav tsum tsim nyog, tej kev swm dhau heev lawm thiab kev hloov pauv ntawm sab kev ntseeg.

Txawm hais tias tej lus khuab xeeb txog kev koom Tswv Yexus rooj mov ntev li cas ib zaus tseem muaj txog niaj hnuv nim no los, cov kev hloov pauv txog kev sib tham, kev kawm, kev pehawm dhau los ntau tiam twb tau txhawb kom cov ntseeg Giám lý Liên Hiệp nrhiav ib txoj kev koj k om haum yog los ntawm tes haujlwm Vajtswv Txojlus thiab Rooj Mov Dawbhuv.

Tseeb tiag, kuj muaj qee cov xav koj noj Tswv Yexus rooj mov txhua lub sijhawm ntau dua. Muaj qee lub tuam tsev Giám Lý Liên Hiệp niaj hnuv nim no koj koom noj Tswv Yexus rooj mov txhua hnuv kaj (hnuv so) - nyob hauv muaj qee lub tuamtsev qheb tej kab ke pehawm tshwj xeeb ntawm tej tsev thov Tswv, muaj qee lub koj kev pehawm Vajtswv nyob rau txhua hnuv kaj ua ke. Feem ntau cov pawg ntseeg Giám Lý Liên Hiệp

koom noj Tswv Yexus rooj mov ib lub hli ib zaus, nyob rau thawj hnub so hauv ib lub hlis. Kuj muaj qee lub coj koom noj Tswv Yexus rooj mov nyob rau tej hnub uas tseem ceeb tshwj xeeb xws li: koob tsheej Yexus yug, koob tsheej Tswv Yexus nqes los, koob tsheej hmo tsib ntawm kiab dawbhuv, koob tsheej Tswv Yexus sawv, koob tsheej Vaj Ntsuj Plig nqes los. Txawm yog Tswv Yexus rooj mov tsis tau coj nyob rau txhua lub sijhawm los qhov uas xav kom Tswv Yexus rooj mov tau coj koom noj txhua kiab yog ib yam uas haum rau cov ntseeg Khetos.

Lo lus kawg, ntawm no yog ib lo lus nqua hu xav kom peb txais yuav lo lus ntawd thiab tuaj koom txais noj Tswv Yexus rooj mov thiab koom noj nrog cov ntseeg sawv daws. Twb yog dhau los ntawm peb kev sib ntsib Vajtswv txoj kev hlub pub dawb thiaj txhawb kom peb tig rov qab thiab koom noj ntau zaus dua yog hais tias tau.

Tej Lus Nug Txog Coj Pes Tsawg Zaus Thiab Lub Sijhawm

N: *Kuv muaj ntau tus ntseeg tsis tuaj hauv tuam tsev nyob rau hnub muaj Tswv Yexus rooj mov vim lawv tsis nyiam qhov ntawd. Yog li peb yuav coj noj Tswv Yexus rooj mov nyob rau thawj hnub kaj hauv ib lub hli lossis peb coj rau tej lub caij nyoog uas muaj kev tshwj xeeb xwb?*


T: Muaj ob qib teb rau lo lus nug no. Qib thib ib, koj tsim nyog mus nrhiav lo lus teb seb yog vim li cas koj cov ntseeg ho tsis tuaj koom rau hnub muaj Tswv Yexus rooj mov? Yog tias lo lus teb yog vim lawv kev paub txog Tswv Yexus rooj mov ces koj yuav tau cob qhia lawv txog lub ntsiab lus no. Phau ntawv *THM* qhia tawm tej yam zoo thaum koom nrog tej kevcai dawb huv no thiab tej yam zoo txais tau thaum koom noj Tswv Yexus rooj mov yog nqua hu sawv daws los muaj ib txoj kev sib raug zoo rau ntawm Khetos lub cev.

Yog tias koj khuab xeeb txog txoj kevcai coj noj Tswv Yexus rooj mov hauv koj lub Tuam tsev—xws li yuav coj noj tag pes tsawg lub sijhawm, coj li cas thiaj yog zoo—ces koj cia li tig rov qab mus saib rau feem kevcai, lub ntsiab lus, thiab tej txheej txheem coj. Phau

ntawv nrog phau *THM* yog phau Ua Neej rau Hauv Tej kev Xav Tsis Thoob (Living into the Mystery). Phau ntawv no twb taw qhia tej kevcai tiag taw ua hauv paus li no:

“Cia li xav qhob tseeb, cia li ua siab ntev. Tsom ntsoov rau kev nqes tes. Cia li nqes tes kev pehawm ntawm txhua tus. Cia li muab yam zoo tshaj uas koj muab tau. Thiab dhau ntawd, cia li qhia tawm koj txoj kev coj thiab kev koom nrog pehawm kom qhia tawm tias txhua yam yog vim peb yog Khetos lub cev uas twb tau txhiv dhau los ntawm Nws cov ntshav dhau ntawm Vaj Ntsuj Plig lub hwjchim.

Lo lus teb thib ob rau lo lus nug txog kev coj Tswv Yexus rooj mov uas tsis coj tau txhua lub sijhawm. Phau ntawv *THM* ceev faj rau peb tias “txhua tus ntseeg uas nrhiav kev coj yus lub neej ntseeg zoo li Khetos cov thwjtim yuav tsum niaj hnuv tau tu kom loj hlob dhau los ntawm Vajtswv txoj lus thiab Kevcai noj Tswv Yexus rooj mov.” Yog li, tseeb tiag, txhua pawg ntseeg tau nqua hu kom “koom noj Tswv Yexus rooj mov nyob rau txhua hnuv uas yog Vajtswv hnuv” thiab nyob rau “tej hnuv uas yog pawg ntseeg teem tseg.” Muab ua lwm lo lus hais, kev coj noj Tswv Yexus rooj mov nyob rau hnuv so thib ib hauv ib lub hli yog qhov tsawg kawg nkaus uas yuav tsum tau coj, txhawb txhua lub pawg ntseeg kom koom noj ntau dua li ntawd.



Txoj Kevcai

Txais Noj Tswv Yexus Rooj Mov

Yog hais tias qhov noj Tswv Yexus rooj mov pes tsawg zaus qhia tawm peb kev paub txog puas mov dawb huv. Ces qhov uas peb txais ncuav thiab khob zoo li cas kuj qhia tawm peb qee qhov kev paub txog puas mov dawb huv no. Txoj kev uas peb txais ncuav thiab lub khob li cas qhia tawm lub koom haum Giám Lý Liên Hiệp keeb kwm tau sib sau los ntawm peb lub koom haum sib txawv: koom haum Truyền Giáo Tin Lành (Evangelical), koom haum Cov Kwvtij Sib Koom Tes “Các Anh Em Liên Hiệp” (United Brethren), koom haum Giám Lý (Methodist), tagrnho txhua lub koom haum no tsis muaj lub twg coj noj Tswv Yexus rooj mov yog tag tag. Muaj ntau txoj kev los coj noj Tswv Yexus rooj mov, ib txoj kev nws muaj ib qho zoo thiab qhia tawm ib lub ntsiab lus zoo txog tej uas tau tshwm sim nyob rau hauv rooj mov.

Nyob hauv qee lub pab pawg Giám Lý Liên Hiệp, cov ntseeg zaum twj ywm ntawm lub rooj zaum thiab txais lub tawb ncuav thiab khob kua me thiab ib tus cev dhau ib tus. Nyob rau lwm lub pawg ntseeg, cov ntseeg tsav los rau ntaw zaj laj kab ntoo, yog qhov chaw uas cov ntseeg txhos caug thiab txais yuav lub ncuav thiab khob. Nyob rau ntawm lwm pawg ntseeg ntxiv, txhua tus mus rau ntawm thaj chaw faib ncuav thiab khob thiab txais noj.

Txawm yog peb zaum—txhos caug lossis sawv ntsug—los tag nrho puav leej yog qhia tawm peb kev to taub txog tus Tswv Rooj Mov.

Qhov uas zaum twj ywm tos lwm tus nga ncuav thiab khob tuaj rau peb ntuas peb nco ntsoov tias, peb tau caw tuaj zaum thiab koom noj puas mov ntawd. Nws kuj ntuas peb nco tias Vajtswv yog tus tuaj ntsib peb ua ntej dhau los ntawm Tswv Yexus Khetos thiab dhau los ntawm muab Nws txoj kev hlub pub dawb rau peb. Koom ib ncig ntawm Vajtswv lub rooj, peb tau noj tau thiab txais tau ntau yam.

Thaum peb mus rau ntawm zaj laj kab ntoo thiab txhos caug, txhais tau tias peb teb Vajtswv lo lus caw kom tuaj rau ntawm nws lub rooj. Peb mus raws li Vajtswv lo lus caw, thiab paub tias Vajtswv twb tsav los ze peb thiab

tabtom tos peb teb thiab txais yuav nws. Txawm li ntawd los, qhov uas peb txhos caug rau ntawm zaj laj kab ntuas kom peb nco ntsoov tias Vajtswv yog tus Tswv ntawm lub ntuj thiab lub ntiajteb. Zaj laj kab muaj lub ntsiab tias txwv tsis pub peb mus ze rau ntawm Vajtswv lub rooj dawb huv yog qhov chaw tso ncuav thiab khob dawb huv, thiab kuj yog ntuas peb nco txog peb lub meej mom thiab lub chaw yog nyob qhov twg ntawm Vajtswv lub xub ntiag. Twb yog vim peb tsis tsim nyog tau txais, yog li txhua zaus uas tsav mus ze Vajtswv lub zwm txwv peb yuav tau nyo hau thiab txhos caug, txo hwjchim taij thov Vajtswv lub siab khuvleej thiab Nws txoj kev hlub pub dawb rau peb.

Kuj zoo ib yam li qhov uas tsav mus rau ntawm zaj laj kab thaiv ib ncig ntawm Vajtswv lub rooj, ces qhov uas peb tsav mus ntawm lub chaw txais ncuav thiab khob kuj yog qhia tias peb teb yuav Vajtswv lo lus nqua hu tuaj koom Nws rooj mov. Peb hnov lo lus hu: “Cia li tuaj, peb koom ua ke” thiab peb tabtom tuaj. Qhov uas peb sawv ntsug ntuas kom peb nco tias peb tabtom tuaj kom los ntawm lub siab xyiv fab thiab ua tsaug. Tom qab uas peb lees peb tej kev txhaum thiab twb hnov lo lus tab pov tias peb twb tau zam txim lawm, ntawd yog “ib qho yog, zoo thiab yog qhov zoo siab,” kom ua Vajtswv tsaug thaum peb los koom puag ncig ntawm lub rooj mov dawb huv.”

Kuj muaj qee lub pawg ntseeg Giám Lý Liên Hiệp, Tswv Yexus rooj mov tau koom ua ke los ntawm tib lub khob xwb (hauv cov pawg ntseeg loj dua, ces muaj ntau lub khob loj) thiab ntais ib lub ncuav.

Dhau cov pawg ntseeg ntawd, kuj muaj tej pab pawg lawv siv tej lub vab tso cov khob me rau hauv thiab tej lub vab tso cov ncuav uas twb muab txiav ua tej daim me me lawm.

Qhov uas pawg ntseeg siv nyias muaj nyias ib lub khob haus tau pom ntau nyob rau tiam 20, ib feem twb yog lub sijhawm ntawd muaj cov kab mob kis loj heev tuaj yog li sawv daws ua li no kom tsis txhob kis mob. Qhov uas niaj hnub nim no tseem coj li no los yog vim xav kom xeeb huv rau sawv daws. Txawm li ntawd los, thaum peb xav txog tej yam ntxwv zoo ntawm Tswv Yexus rooj mov, qhov nyias muaj nyias ib lub khob yog peb saib qhov uas nyias tus kheej muaj kev sib raug zoo nrog Vajtswv tseem ceeb dua li qhov uas sawv daws yuav tsum muaj kev sib raug zoo ua ke, dhau los ntawm

tus xibfwb kom tagnrho sawv daws tuav yus daim ncuav thiab lub khob
tos kom tagnrho txhua tus puav leej tau txais mam sib haus ua ke.

Qhov uas koom siv ib lub khob thiab koom ib lub ncuav twb tau dhau
los yog qhov uas pawg ntseeg coj ntau dua los txog niaj hnuv nim no.
Nws txhawb peb lub siab tig rov qab mus saib txog tej zaj xwm txheej hauv
Vajluskub saum chav tsev siab, nyob saud Tswv Yexus muab ib lub ncuav
thiab ib lub khob faib rau cov thwjtim. Nws kuj ntuas peb nco txog Paulus
tej lus tau hais nyob hauv 1 Kauleethaus 10:16-17:

¹⁶ Peb ua Vajtswv tsaug rau qhov peb muaj lub khob koob hmoov no.
Thaum peb haus cov cawv txiv hmab hauv lub khob no, twb yog peb
qhia hais tias peb koom Yexus Khetos cov ntshav. Thaum peb muab
lub ncuav los ntais noj twb yog peb qhia hais tias, peb koom Yexus
Khetos lub cev. ¹⁷ Tsuas muaj tib lub ncuav xwb, txawm yog peb muaj
coob leej los peb sawvdaws koom ib lub cev, rau qhov peb noj tib lub
ncuav xwb.

Hauv peb pawg ntseeg Giám Lý Liên Hiệp kev coj noj Tswv Yexus rooj
mov, feem ntau peb khuab xeeb txog qhov uas lub sijhawm coj noj hov
ntev dua li qhov uas xav txog lub ntsiab lus ntawm Tswv Yexus rooj mov
twb pab peb li cas kom muaj kev sib raug zoo nrog Vajtswv thiab nrog lwm
tus ib ncig. Yog li, txawm yog peb yuav zaum, txhos caug lossis sawv ntsug,
txawm peb yuav koom ib lub khob lossis nyias siv nyias ib lub khob los,
lub ntsiab lus uas peb koom noj Tswv Yexus rooj mov yog nqua hu kom
tagnrho peb sawv daws yuav tsum muaj txoj kev sib raug zoo dawb huv
nrog Vajtswv thiab nrog lwm tus ua ke.

Lwm Lo Lus Nug Uas Pheej Ntsib

Nyob rau lub sijhawm uas muaj ntau txojkev coj thiab ntau txoj kev kawm
paub txog tej no, tej thaum peb yuav nug tias, yog li puas yuav muaj ib lub
rooj kevcai coj noj Tswv Yexus rooj mov twg es tsis tag yuav hais nyav txog
peb tej kev kawm paub niaj hnuv nim no. Cov kev sib tham nyob rau ntu
ntawv ntawm no yuav teb qee puav lo lus nug uas peb khuab xeeb.

Thib ib, nyob ntawm sab kev muaj tiag thiab sab lus piv txwv, qhov tseem ceeb yog peb yuav tsum siv lub ncuav yog ncuav mos tiag, ua rau peb muaj kev sib txuas txog tej zaj xwm txheej uas tau muab pub rau peb, dhau los muaj tiag, yog cov ncuav cawm txoj sia.

Thib ob, peb nco txog Paulus cov lus ntuas kom peb yuav tsum tau cim ntsoov tias Khetos lub cev tabtom tshwm muaj nyob hauv peb. Yog li, tej kev coj noj Tswv Yexus rooj mov twg uas tsis qhia tawm lub ntsiab lus yog yuav tsum muaj kev sib raug zoo dawb huv nrog Vajtswv thiab nrog lwm tus ces tsis mus raws li pawg ntseeg Giám Lý Liên Hiệp lub haum phiaj txog Tswv Yexus rooj mov.

Yam kawg, yog tias peb txwv ib tug twg twb tau ua kevcai raus dej (tshwj xeeem yog cov menyuam uas twb tau ua kevcai raus dej lossis cov neeg uas tsis mee pem) tsis tau koom noj Tswv Yexus rooj mov, ces twb yog peb coj tsis tau yam thib ib thiab yam thib ob saud, qhia tau tias peb tsis totaub tseeb thiab mee txog Khetos lub cev.

Cov Lus Nug Txog Kev Coj Noj Tswv Yexus Rooj Mov

N: *Txoj kev pehawm twg uas peb muaj feem siv rau kevcai noj Tswv Yexus rooj mov nyob rau hmo ua koob tsheej Yexus yug? Puas yog tus xibfwb yuav tsum nyob ntawd mus tag lub sijhawm, lossis peb muab cov ncuav thiab khob uas twb tau Thov Vajtswv foom koob hmoov tso rau ntawm lub rooj es sawv daws nyias noj nyias?*

T: Zoo li twb tau hais rau ntu saud lawm, phau ntawv *THM* qhia meej tias, “qhov uas foom koob hmoov rau ncuav thiab lub khob ua ntej... nws tsis haum thiab mus tsis raws li keeb kwm pawg ntseeg thiab peb txoj kev kawm paub txog Vajtswv txoj kev hlub pub dawb uas tau muab pub dawb dawb nyob rau hauv rooj mov ntawd.

Txoj kevcai no, ib feem, yog tau tsim los ntawm Tswv Yexus rooj mov uas muaj lub ncuav thiab lub khob. Txhais tau hais tias, peb coj noj Tswv Yexus rooj mov tsis yog tsuas yog kev sib raug zoo ntawm peb

tus kheej thiab Vajtswv xwb; tiamsis ntawd kuj yog peb tabtom koom kev sib raug zoo nrog lwm tus ua ke. “Kevcai noj Tswv Yexus rooj mov yog kev sib raug zoo ntawm pawg ntseeg uas yog ib pab pawg koom ib txoj kev ntseeg, txawm yog thaj chaw twg lossis mus thoob ntiajteb. Txawm yog paub hais tias nws muaj lub ntsiab lus zoo rau tus uas los



koom noj, tiamsis rooj mov ntawd tsis yog npaj rau ntiag tus ntawm nyias tus kheej xwb...Qhov uas Tswv Yexus rooj mov tau muab faib mus thiab sib koom ua ke ntawm Vajtswv lub rooj dawb huv twb hais qhia tawm tus yam ntxwv zoo ntawm pawg ntseeg thiab yog tus qauv zoo uas Vajtswv xav ua rau lub ntiajteb.

Tej kevcai no nws cuam tshuam txog rau ntawm pawg ntseeg kev koom ua ke, ua rau phau ntawv *THM* thiaj hais meej meej tias: “Tagnrho ob txoj kev coj txog Tswv Yexus rooj mov: “cim civ noj” (txhua tus sib pab noj) thiab “npaj ua

ntej” (lub chaw uas ncuav thiab khob twb tau thov thiab foom koob hmoov rau ua ntej), puav leej tsis raws li lub ntsiab lus ntawm Tswv Yexus rooj mov, uas yog ib pab pawg kev ntseeg los koom ua ke.

N: *Peb tso peb kev pehawm Vajtswv rau saum fuab cua (live) rau peb cov ntseeg uas xav koom nrog saum. Yog li puas muaj ib txoj kev twg uas zoo thiab haum kom lawv nrog koom tau Tswv Yexus rooj mov?*

T: Lus teb rau lo lus nug no, txawm yog nws nyuaj dua lo lus teb txog ntawm kev sib raug zoo “npaj tso tseg ua ntej”, tiamsis kuj tau tsim los dhau ntawd tej kevcai zoo ib yam.

Ib lo lus hais meej meej yog txog tej yam nyob hauv Tswv Yexus rooj mov: ncuav thiab lub khob twb “tau ntxuav kom dawb huv thiab tau siv rau hauv pawg ntseeg uas los koom ua ke.” Txoj kev cai no tau tsim muaj dhau los ntawm ib nqe lus tshaj tawm nyob hauv phau ntawv: “Kevcai koom Tswv Yexus Rooj Mov yog kev sib raug zoo ntawm

pawg ntseeg uas yog ib pab pawg koom ib txoj kev ntseeg, ntawm pawg ntseeg zej zos mus thoob ntiajteb. Txawm yog nws muaj lub ntsiab tseem ceeb rau ntawm cov ntseeg tus kheej los Tswv Yexus rooj mov tsis yog tsuas siv rau tus kheej xwb...Qhov uas sib koom sib txuas ua ke rau ntawm Vajtswv lub rooj qhia tawm pawg ntseeg tus yam ntxwv thiab qhia tawm tus qauv uas Vajtswv xav kom lub ntiajteb coj raws li.” Ib txoj kevcai ntxiv kuj zoo ib yam tau tshwm tawm hauv ntu kawg ntawm phau ntawv *THM*: “Tswv Yexus rooj mov yuav tsum tau coj li cas kom muaj txoj kev sib txuas ntawm rooj mov dawb huv mus rau ntawm lub neej dawb huv, ntawm tus kheej mus rau ntawm pawg ntseeg...nrog lwm tus muaj kev txuas lus ua ke yog ib lub cim qhia tawm ib pab pawg sib hlub hauv txoj kev ntseeg ntawm ib tug mus dhau ib tug mus thoob ntiajteb.”

Muaj ob qho ua lub cim qhia tawm txog txoj kev sib raug zoo meej meej yog: Thib ib, dhau qhov uas pawg ntseeg los koom ua ke, koom ib lub ncuav thiab ib lub khob. Zoo li kev koom siab thaum lub sijhawm pehawm Vajtswv ntuas peb tias: “rau qhov muaj ib lub ncuav, txawm peb muaj coob tus los peb tsuas koom ib lub cev, rau qhov peb puav leej koom ib lub ncuav xwb.” (1 Kauleesthaus 10:17).

Lub cim thib ob yog peb tsis cim civ los ua haujlwm kom txais tau lub ncuav thiab lub khob, rau qhov lub ncuav thiab lub khob tau muab fij dawb huv dhau ntawm pawg ntseeg lo lus thov Vajtswv, thiab tau ib tug cev dhau ig tus txhais tes (ib tug ntais faib ncuav rau ib tug).

Tej kevcai tau tshaj tawm saud qhia tau tias, txawm peb muaj cuab kav koom pehawm saum fuab cua thiab txais tau txoj kev sib txuas nrog pawg ntseeg los, vim peb tsis muaj kev sib txuas sab nqaij tawv tiag tiag ntawm ib tug dhau ib tug, yog li qhov ntawd yuav yog txoj kev tav ua rau peb koom tsis tau nrog sawv daws noj Tswv Yexus rooj mov ua ke.

Zoo li twb tau hais saud, Pawg Ntseeg txhawb kom txhua pab pawg nrhiav ntau txoj kev mus tshaj tawm txojmoo zoo, tsis tag qhov uas siv tej kev txawj ntse zoo li fuab cua. Txawm tias, koom saib pawg ntseeg pehawm thiab nrog pawg ntseeg thov Vajtswv dhau saum fuab cua thaum lub sijhawm pawg ntseeg tabtom koom noj Tswv Yexus rooj mov ntawm tuam tsev yog yam uas yeej haum, tiamsis nyob rau xyoo

2023, lub rooj sab laj xibfwb qib siab (hội đồng giám mục) twb tau tshaj tawm lus samhwm txwv tsis pub txhua pawg ntseeg Giám Lý Liên Hiệp coj noj Tswv Yexus rooj mov dhau saum fuab cua internet.

Yog li qhov twg thiaj yog qhov kevcai haum rau cov pab pawg uas koom saum fuab cua xav los koom noj Tswv Yexus rooj mov? Kuj zoo ib yam li tag nrho txhua tus uas xav “muaj kev sib raug zoo ua ke tiamsis koom tsis tau tim ntsej tim muag nrog pawg ntseeg kev pehawm.” Xibfwb lossis tus uas sawv cev ntawm pawg ntseeg mam nqa ncuav thiab khob uas twb tau siv ntawm tuam tsev mus rau lawv. Txhua tus uas nyob deb tuam tsev heev lawm ua rau xibfwb mus ncav tsis cuag ces txhawb lawv kom lawv mus koom nrog ib lub tuam tsev uas nyob ze lawv.

N: *Yog tias peb ntseeg tias Tswv Yexus tshwm muaj tiag nyob rau hauv Nws rooj mov, yog li tsis yog peb yuav tsum nqa ncuav thiab lub khob mus rau tom tej tshav tsheb thiab muab pub rau tus uas lawv xav txais lov?*

T: Yog ntawm lo lus hais, yam no nws muaj nuj nqis heev, tiamsis peb cia li mus nrhiav lub ntsiab lus no kom tob dua.

Thib ib, qhov uas pawg ntseeg Giám Lý Liên Hiệp muaj kev to taub txog Tswv Yexus tshwm ntsej muag nyob rau hauv Nws rooj mov dawb huv tsis yog tsuas nyob ntawm lub ncuav thiab khob kua txiv hmab xwb tiamsis “Khetos tseem tshwm nyob rau lub sijham uas pawg ntseeg sib sau tuav Tswv Yexus lub npe los pehawm ua ke...dhau ntawm Vajtswv txoj lus tau tshaj tawm thiab sam hwm, thiab kuj dhau ntawm cov ncuav thiab khob uas tau faib noj haus ua ke.” Lub ntsiab lus no tau tshaj tawm dhau ntawm lo lus: “Peb to taub txog lub ntsiab lus kev tshwm ntsej muag nyob rau hauv txoj kev sib raug zoo.”

Thib ob, Tswv Yexus rooj mov tsis tau muab cais tawm ntawm kev tshaj tawm Txojmoo zoo nyob hauv Vajluskub thiab kev qhuab qhia. Vajtswv txoj lus thiab Tswv Yexus rooj mov “ib yam sib pab pwv rau ib yam kom dhau los yog ib rooj kev pehawm yog thiab haum txaus nkaus. Yog tias muab ob qho no sib cais yuav ua rau Vaj Ntsujplig txoj

kev ciah sia puv ntoob uas tau muab pub rau peb dhau ntawm peb lub siab txais yuav Tswv Yexus Khetos tsis muaj zog lawm. Koom noj Tswv Yexus rooj mov twb yog qhia tias peb tabtom koom mus rau hauv Vajtswv txoj lus uas tau tshaj tawm.

Ob txoj kev cai saud xav qhia tawm hais tias qhov uas Khetos tshwm ntsej muag tsis yog tsuas dhau ntawm ncuav thiab khob kua txiv hmab xwb tiamsis kuj dhau los ntawm pawg ntseeg kev koom pehawm ua ke thiab dhau los ntawm qhia Vajtswv txoj lus thiab ntawm Tswv Yexus rooj mov nyob rau txhua lub sijhawm uas pawg ntseeg los koom ua ke. Qhov no tsis yog muaj lub ntsiab lus tias tsuas txais ncuav thiab khob kua ntawm tej thaj chaw tshiab xwb, tiamsis dhau los ntawm tagnrho pawg ntseeg kev pehawm ua ke. Raws li lub tswvyim kom teb lwm lo lus nug, ncuav thiab khob kua txiv hmab hauv Rooj mov “tau saib zoo li ib yam khoom dawb huv thiab tau siv nyob rau lub sijhawm pawg ntseeg los koom pehawm ua ke.” Tej no kuj qhia tawm txog txoj kev tseem ceeb ntawm kev pehawm Vajtswv dhau Vajtswv txojlus hauv Vajluskub thiab kev qhuab qhia zoo li ib feem ntawm Tswv Yexus rooj mov.



Thib peb, muaj ib qho txawv ntawm kev faib ncuav thiab khob kua txiv tsis xaiv ntsej muag thiab Tswv Yexus rooj mov tau faib nthuav dav mus rau coob tus. Qhov no twb tau phau *THM* hais meej tias Tswv Yexus rooj mov txhua txhua lub sijhawm yeej tau pib los ntawm lo lus nqua hu, kev lees txim, kev zam txim. Lo lus nqua hu no yog pub rau tag nrho txhua tus uas tuaj rau ntawm Tswv Yexus rooj mov, tsis hais lub koom haum twg, puav leej tuaj txais tau zoo li ib lo lus

teb rau yus lub siab ntseeg, zoo li yog teb txais yuav Tswv Yexus Khetos txoj kev hlub tau tshaj tawm thiab qhia tawm nyob rau hauv pawg ntseeg.

Qhov uas pawg ntseeg coj noj ncuav thiab haus lub khob tsis faib cais ces pawg ntseeg yuav coj tsis tau Tswv Yexus rooj mov yog tias pawg ntseeg muab lo lus nqua hu, lees txim thiab los ntseeg tso pov tseg, thiab tso dhau pawg ntseeg tes haujlwm uas yuav tsum nqua hu txhua tus mus rau ntawm “lub neej sab kev ntseeg thiab loj hlob ntawm sab kev dawb huv.

Cov Lus Nug Txog Tus Coj Thiab Tes Haujlwm

N: *Kuv yog ib tug Tub Qhia Moo Zoo - Thấy Truyền đạo (Certified Lay Minister) tab tom pab dejnum hauv ib lub pawg ntseeg pem toj siab. Kuv puas cheem tsum tus Xibfwb saib xyuas thaj tsam (giáo hạt trưởng—District Superintendent) lossis ib tug Kws xibfwb (Elder) twg thov Vajtswv rau cov ncuav thiab khob rau hnub Kaj uas noj Tswv Yexus rooj mov? Lawv puas muaj cai ua li ntawd dhau ntawm lub xov tooj lossis saum fuab cua?*

T: Phau ntawv *THM* twb tau teb meej meej li no tias: Txawm yog yuav tau coj li cas (xov tooj, Skype, FaceTime, lossis dhau lwm txoj kev saum fuab cua) los, “qhov uas peb muab lub ncuav thiab khob coj los thov Vajtswv ua ntej nws tsis haum li peb txoj kev ntseeg thiab kev kawm paub txog Vajtswv txoj kev hlub uas tau muab pub nyob rau hauv Tswv Yexus rooj mov (Nqe XVIII, Kev Ntseeg cov Nqe Kevcai, *BOD*; 64).

Qhov khuab xeeb txog hauv nqe lus tshaj tawm no yog Kevcai Txhawb Nga thiab Ua Tsaug, tsis yog hais txog kev “dawb huv” tiamsis yog hais txog qhov uas pawg ntseeg los koom ua ke ntawm Vajtswv lub rooj thiab ua tsaug, qhuas Vajtswv. “Ncuav thiab khob tau fij kom dawb huv tau coj los siv rau lub sijhawm sawv daws koom ua ke.

N: *Leejtwg yog tus muaj cai thov Vajtswv foom koob hmoov rau cov ncuav thiab lub khob uas twb tau npaj tseg ua ntej tso ntawm tsev lossis twb tau xaa tuaj dhau tej chaw xaa khoom kom tau siv rau tej rooj kevcai saum fuab cua txog Tswv Yexus rooj mov? Puas yog tus Kws Xibfwb thiaj muaj cai thov lossis cov fibfwb tuav haujlwm (nhiệm chức) kuj muaj cai?*

T: Phau *THM* hais tawm meej meej tias: “ib tug Kws xibfwb lossis ib tug xibtwb tau tso cai raws li Phau Kab Lis Kevcai hauv Koom Haum ces tau cai coj noj Tswv Yexus rooj mov.

Txawm li ntawd los, raws li peb twb hais yuav tau ceev faj txog cov lus nug txog kev koom noj Tswv Yexus rooj mov dhau saum fuab cua (saib ntu saum toj), qhov uas coj faib Tswv Yexus rooj mov dhau saum fuab cua twb raug txwv tsis pub coj los ntawm lub Rooj Sab Laj cov Xibfwb Txwjlaug Qib Siab xyoo 2014, yog li qhov uas npaj ncuav thiab khob los coj li ntawd nws tsis haum txoj cai.

N: *Peb muaj ib tug Tub Pab Dej num (ordaineddeacon) tau tsa cai los ua haujlwm zoo li ib tug thawjcoj hauv peb pab. Yog li tus Tub pab Dej num lub luag haujlwm nyob rau hauv kevcai noj Tswv Yexus rooj mov yog dabtsi?*

T: Koom Haum Phau Kab Lis Kevcai (320) hais tias cov Tub pab dej num (Deacons) yuav tsum pab “cov Kws Xibfwb (Elders) nyob hauv tes haujlwm coj noj Tswv Yexus rooj mov.” Ib yam ntxiv, phau *THM* sau li no hais tias: “Yog cia kom coj mus raws li keeb kwm dhau los... cov Tub pab dej num li haujlwm nyob hauv Tswv Yexus rooj mov yog nyeem cov zaj hais txog Txojmoo zoo, coj lub sijhawm thov pab rau lub ntiajteb, rau pawg ntseeg thiab rau cov neeg pluas txomnyem; txais ncuav thiab npaj lub rooj ncuav ua ntej lub sijhawm uas ua kevcai Txhawb Nqa Ua tsaug, pab haujlwm rau cov xibfwb thaum faib ncuav thiab khob; saib xyuas haujlwm ntawm lub rooj mov, thiab npaj cov ntseeg ua ntej uas lawv yuav tau tus xibfwb thov Vajtswv foom koob hmoov rau.

Phau ntawv *Ua Neej Nyob Hauv kev Xav Tsis Thoob (Living into the Mystery)*” nthuav qhia dav dua txog cov Tub pab dej num li haujlwm ntawm Tswv Yexus lub rooj mov: “Tub pab dej num muaj cai txais ncuav thiab khob, thiab muab tso rau ntawm lub rooj kom haum. Tub pab dej num kuj muaj cuab kav laub cov kua txiv hmab rau hauv lub khob, thiab tab pov hais tias txhua yam thiab txhua tus nyob yog chaw lub sijhawm uas pib ua kevcai Txhawb Nqa Ua Tsaug. Yog hais tias cov khoom plig twb tau muab tso rau saum lub rooj thiab tau muab vov lawm, cov tub pab dej num muaj cuab kav mus nrog lwm tus ua haujlwm, xws li nrog cov uas pab dej num ua ke, qhia kom yooj yim txog cov khoom plig, ua tib zoo hais lus kom haum, thiab muab daim ntaub tso rau kom haum ntawm lub rooj ib sab.

N: *Peb muaj ob tug xibfwb nyob hauv pab thawjcoj, thiab lawv xav sib faib kev coj Tswv Yexus rooj mov. Yog li puas muaj ib txoj kev twg uas zoo thiab haum los qhia txog kev faib haujlwm ntawm ob tug nyob hauv Tswv Yexus rooj mov?*

T: Txawm yog phau *THM* twb muaj lo lus teb meej meej rau lo lus nug no los nws muaj qee qhov tswvyim rau peb li no:

Ua ntej, peb yuav tsum nco ntsoov tias kevcai Txhawb Nqa Ua Tsaug yog tib co lus sib quas xwb xwb (nws tsis yog ib co lus dawb huv uas tau sib sau los ua ke) tau tus coj thiab cov ntseeg hais ua ke. Yog li, txawm yog yuav siv mus li cas los nco ntsoov hais tias ntawm no yog ib co lus thov txoos ua ke. Thiab txawm yog sib faib lo lus thov no li cas los yuav tsum tuav qhov uas ntawm no yog tib nqe lus thov xwb. Dhau li ntawd, kuj tsis muaj ib feem twg ntawm nqe lus thov no tau muab cob rau tus Tub pab dej num lossis tus Tub tshaj moo zoo. Raws li phau *THM* twb tau ceev faj txog, “ib tug Kws Xibfwb lossis ib tug xibfwb tau tso cai yuav coj Pawg ntseeg nyob rau hauv feem ua kevcai Txhawb Nqa Ua Tsaug, thiab nyob hauv tagrho sawv daws nyias paub nyias haujlwm.”

Yam thib ob, raws li phau *THM* twb qhia tawm, “Tagrho txhua tus Kws xibfwb lossis cov tub pab dej num tshwm ntsej muag puav leej muaj cai tau caw...los sawv nrog tus xibfwb coj lub sijhawm ntawm

lub rooj mov thiab pab kev faib ncuav thiab khob.” Thiab *THM* kuj qhia ntiv hais tias txawm yuav muaj ntau tus xibfwb tau tsa cai sawv ntawd los tsuas muaj ib tug xibfwb sawv los nres lub sijhawm koj noj Tswv Yexus rooj mov xwb.

Hauv qab no, lo lus teb thib ib yog hais kom ob tug Kws xibfwb sib hloov los nres lub sijhawm koj Tswv Yexus rooj mov. Qhov no yog xav qhia tseeb rau pawg ntseeg hais tias, tag nrho txhua tus Kws xibfwb, txawm yog lawv yog tus xibfwb tuav pawg ntseeg lossis tus xibfwb “pab haujlwm”, txawm yog poj niam lossis txiv neej, thiab tabtom tuav lub meej mom twg los lawv puav leej tau tso cai ib yam nyob rau hauv tes haujlwm txog tej kevcai dawb huv ntawm pawg ntseeg. Dhau li pawg ntseeg kuj tau hnov ntau lub suab sib txawv thiab kev koj sib txawv ntawm ib tug xibfwb. Lo lus teb thib ob, yog kom ob tug xibfwb ceev faj txog ntawm kev koom ua ib ntawm zaj lus Txhawb Nqa Ua Tsaug thiab ob tug yuav tsum sib faib koj li cas kom qhia tawm lub ntsiab tias ntawd yog ib nqe lus thov xwb. Thiab txoj kev faib haujlwm no kuj yuav tsum tau xyaum kom tsis txhob ua rau cov lus thov tsis sib txuas. Cia li siv ntu Kevcai Txhawb Nqa Ua Tsaug nyob hauv feem Vajtsv txojlus thiab Vajtsv Lub Rooj los ua piv txwv, cov lus thov tau muab faib li no:

XF1: Pib zaj lus sib quas dhau “txoj pa ntawm lub neej”.

XF2: “Thaum peb tig ntsej muag mus... dhau cov cev lus.

XF1 thiab XF2 sib hais: “Yog li, los ntawm Vajtsv koj cov menyuam nyob haub ntiajteb...”

Tagnrho: “Dawb huv, dawb huv, dawb huv...”

XF1: Vajtsv Koj yog tus dawb huv...tham Koj cawm Koj cov menyuam.”

XF2: Vajtsv Koj twb kho zoo tus neeg muaj mob...Koj txojlus thiab Vaj Ntsuj plig.”

E1: “Nyob rau hmo...kom nco ntsoov txog Kuv”

E2: “Thaum noj hmo tag...Kom nco ntsoov txog Kuv.”

E1: “Thiab yog li ntawd, kom nco txog...kev ntseeg uas xav tsis thoob.”

Tagnrho: Tswv Yexus Khetos twb tuag...”

XF1: “Cia li nchuav Vajtswv tus Ntsuj plig...los ntawm Tus Tswv cov ntshav.”

XF2: “Dhau los ntawm Vajtswv tus Ntsuj Plig...nyob hauv Nws rooj mov saum ntuj ceeb tsheej.”

XF1 thiab XF2 hais ua ke: Dhau Vajtswv Leejtub uas yog Tswv Yexus Khetos...”

Tagrho: “Amees!”

Qhov haujlwm sib faib li no yuam kom ob tug xibfwb yuav tsum xyaum tib zoo ua ntej kom thaum sib hloov ib tug hais tag ib tug hais thiaj tsis yuam kev thiab tsis khuab lus kom thiaj qhia tawm lub ntsiab tseem ceeb.

Cov Lus Nug Txog Ua Tib Zoo Txog Ncuav Thiab Khob

N: *Thaum twg yog lub sijhawm uas peb tsim nyog koj ncuav thiab khob mus pub rau cov neeg uas tsis tuaj koom noj Tswv Yexus rooj mov? Ib kiab tom qab puas tau? Lossis tom qab ib lub blis? Peb puas muaj cai cia cov ncuav thiab khob nyob ntev dua?*

T: Txawm yog THM tsis teb meej lo lus nug no los, tiamsis nws kuj qhia ib txoj cai tias “Rooj Mov dawb huv tau nthuav dav, tsis pub lig sijhawm yog tias tsis cheem tsum, yog hais txog cov neeg laus uas koom tsis tau vim lawv hnuv nyoog, muaj mob lossis lwm yam li ntawd.” Qhov no yog qhia hais tias peb muaj cuav kav koj ncuav thiab khob mus cev rau tus uas lawv tuaj koom tsis tau, ntawm no yog Tswv Yexus rooj mov nthuav dav ntawm pawg ntseeg. Ntawm no tsis yog ib txoj kev cai ua kom “coj tau” Tswv Yexus rooj mov, thiab kuj tsis yog Tswv Yexus rooj mov “seem” koj mus pub. Qhov uas peb koj mus pub tsis yog tsuas yog ncuav thiab khob xwb tiamsis tseem yog qhov uas peb to taub txog kev sib raug zoo nrog lwm tus nyob rau hauv Yexus Khetos. Ntawm no yog ib txoj kev sib raug zoo uas peb twb noj muaj kev xyiv fab luag ntshi ntawm Vajtswv lub rooj thiab tamsim no peb nthuav dav mus rau cov uas tuaj koom tsis tau vim muaj tej yam tab kaum.

Tseeb tiag, peb tsim nyog coj ncuav thiab khob mus rau tus uas koom tsis tau rau hnuv ntawd, lig heev yog hnuv tom qab vim rau qhov ncuav yuav puag thiab khob kua yuav sawv keeb. Yog tias ua lig lawm yuav ua poob txoj kev sib raug zoo uas yog lub ntsiab lus peb xav qhia tawm. Thaum peb tsis muaj sijhawm mus saib tus uas tuaj tsis tau koom raws lub sijhawm ces tus xibfwb yuav tsum npaj ib lub sijhawm tshwj xeeb mus saib nws yog mus coj nws koom noj Tswv Yexus rooj mov. (Saib ntxiv ntu “Tswv Yexus rooj mov nthuav dav” uas tau Mark Stamm sau).

N: *Yuav muab cov ncuav thiab khob uas seem nchuav pov tseg li cas kom thiaj haum kevcai?*

T: Phau *THM* nthuav tawm ib txoj kevcai muab ncuav thiab khob uas seem pov tseg li no: “cov ncuav thiab khob uas twb tau muab fij dawb huv yuav tsum saib nws los ntawm kev hwm thiab saib taug zoo li ib qho khoom plig ntawm Vajtswv tus uas tsim ntuj tsim teb, raws li Vajtswv txoj lus nyob hauv kevcai Txhawb Nqa Ua Tsaug, ncuav thiab khob dhau los yog Khetos lub cev thiab Khetos cov ntshav uas muab pub rau peb (nplooj ntawv 30).” Tej kev qhia no tseem tau hais tawm nyob rau hauv phau Kev Pehawm (30): “qhov uas peb siv ncuav thiab khob uas seem yuav tsum qhia tawm peb kev hwm Vajtswv, saib zoo li yog Vajtswv qhov khoom plig muab pub rau peb los ntawm lub siab dawb huv uas lub ncuav thiab lub khob twb tau muab pub rau peb.”


Nyob hauv kev tseeb muaj tiag, ntawm no muaj lub ntsiab lus li no, thib ib: cov ncuav thiab khob uas seem yuav tsum tau muab cob rov qab rau cov uas npaj rooj mov hnuv ntawd uas yog cov tub pab dej num kom tom qab coj mus faib pub rau cov neeg uas raug mob thiab cov uas tuaj koom tsis tau rau hnuv ntawd vim tej yam tab kaum cheem tsum.

Thib ob, rau qhov ntawm no yog tej qhov khoom plig noj haus, “xibfwb thiab / lossis cov uas tau xibfwb cob qhia “muaj cuab kav” siv los ntawm lub siab hwm tom qab noj Tswv Yexus rooj mov tag.” Yam kawg, ncuav thiab khob kuj tau muab laub, faus lossis hlawv kom nws rov mus rau hauv av thiab mus ua av. Ncuav thiab khob uas seem tsis

tsim nyog muab laub lossis pov rau hauv tawb khih hnyiab. Phau “Ua neej rau Hauv Kev Xav Tsis Thoob twb tau ceeb toom ib nqe lus hais tias: “ncuav thiab khob muab cia mus rau hauv av yuav yog ib qho tim khawv tseem ceeb rau lub ntiajteb. Kuj ib yam li ntawd, cov ncuav thiab khob kua uas muab cia ploj mus nrog av yog ib feem me xwb. Qhov uas pom tej daim ncuav loj muab pov rau ntawm tej tshav puam ntawm lub tuam tsev yog ib qho tsis zoo, tsis ntxim saib thiab qhia tau tias peb tsis txuag khoom. Peb yuav zam tau qhov no yog tias peb tsuas npaj cov ncuav kom haum txaus rau cov neeg tuaj koom xwb.

N: *Peb tabtom coj noj Tswv Yexus rooj mov nyob rau hauv pab pawg Tub Ntxhais Hluas rooj txhawb siab. Yog li peb puas muaj cai muab ncuav “Donuts” thiab kua txiv ntoo los hloov ncuav mos thiab kua txiv hmab?*

T: Nyob rau txhua lub tebchaws sib txawv, kuj muaj cuab kav hloov ncuav mos thiab kua txiv hmab, tiamsis tej khoom uas tau coj los hloov ntawd yuav tsum yog cov uas pawg ntseeg txoj kevcai twb tso cai. Phau *THM* twb hais meej txog qhov tseem ceeb ntawm “kev coj raws li keeb kwm hauv pawg ntseeg ntiajteb” tau qhia tawm dhau ntawm qhov uas siv ncuav thiab khob. Hais txog ncuav, phau *THM* hais tias, yog kom haum raws li Vajtswv txoj lus thiab keeb kwm cov ntseeg Txojmoo zoo, ces pawg ntseeg siv ncuav mos los noj Tswv Yexus rooj mov.” Txhais tau tias, lub ncuav txawm yog “tau ua los ntawm yam hmoov nplej twg los yuav tsum muaj tus yam ntxwv thiab tus ntxhiab tsw li ncuav mos.” Lub ncuav txawm yuav muaj keeb thiab tsis muaj keeb kuj tau, tiamsis yuav tsum yog ib lub ncuav pheej tshaj xwb (tsis muaj ib yam dabtsi txawv lo rau sab saud xws li: txhua yam noob, txiv hmab qhuav, tej tshuaj pleev lossis tshuaj tsum kwm lub ncuav). Phau *THM* sau tseg ib nqe kevcai txoos siv rau cov kua txiv hmab: “nyob rau hauv txoj kevcai haum raws li Vajtswv txoj lus thiab keeb kwm cov ntseeg Txojmoo zoo, cov pawg ntseeg dhau keeb kwm los twb tau siv cawv txiv hmab los coj noj Tswv Yexus rooj mov.” Ntau lub tuam tsev, pawg ntseeg Txojmoo zoo thiab Txiv Plig puav leej siv cawv txhua txhua lub sijhawm, tiamsis cov pawg ntseeg Giám Lý Liên Hiệp, txij li tiam thib 19, lawv siv kua txiv hmab uas tsis tau muaj keeb.



Lub Ntsiab Lus Ntawm Sab Ntsuj Plig Txog Tswv Yexus Rooj Mov Dawb Huv

Tswv Yexus rooj mov dawb huv muaj lub ntsiab lus li cas rau ntawm cov ntseeg Giám Lý Liên Hiệp? Nyob rau ntawm lub rooj noj Tswv Yexus rooj mov, peb tau qhia kom hais cov lus yog lus nco tshav ntuj thiab lus ua tsaug. Peb yuav txais tau lub cim ntawm kev ua tiav Vajtswv txoj kevcai yog hwm Vajtswv thiab hlub lwm tus. Peb yuav txais tau ib lub cim qhia txog Vajtswv txoj kev hlub uas ntws los rau peb tsis tu, txawm yog lub sijhawm uas peb pom tias peb tsis tsim nyog tau txais txoj kev hlub ntawd. Qhov uas fij lo lus ua tsaug, koom noj Tswv Yexus rooj mov thiab ib tug faib pub rau ib tug yuav qhia tawm lub neej uas peb txhua tus tau nqua hu kom yuav tsum ua lub neej ntawd thiab yog daim duab qhia txog peb lub neej yuav zoo li cas rau tiam thaum kawg. Txawm yog peb yuav hu rooj mov no tias Rooj Mov Dawb Huv, Tus Tswv Rooj Mov Sib Ncaim, lossis Rooj Kevcai Sib Raug Zoo, los nyob rau hauv, peb yuav txais tau ib yam dabtsi tshiab txog Vajtswv kev tsim dua tshiab, peb yuav txais tau cov khoom noj ntiv zog rau peb lub neej ua thwjtim, thiab peb tau txib mus los ntawm Vaj Ntsuj Plig lub hwjchim kom dhau los yog Khetos lub cev yog mus ua Nws tes dejnum thiab ua haujlwm pub rau lub ntiajtec.

Ntaub Ntawv Nyeem Ntxiv

Eucharist: Christ's Feast With the Church, by Laurence Hull Stookey
(Nashville: Abingdon Press, 1993).

Let Every Soul Be Jesus' Guest, by Mark Stamm (Nashville: Abingdon, 2006).

Living into the Mystery: A United Methodist Guide for Celebrating Holy Communion (Nashville: General Board of Discipleship, 2007).

The Worship Resources of the United Methodist Hymnal, by Hoyt Hickman
(Nashville: Abingdon, 1989).

This Holy Mystery: A United Methodist Understanding of Holy Communion
(Nashville: General Board of Discipleship, 2004).

This Holy Mystery: A United Methodist Understanding of Holy Communion Study Guide, by Gayle Carlton Felton (Nashville: General Board of Discipleship, 2005).

This Holy Mystery: A United Methodist Understanding of Holy Communion A Study Guide for Children, by Carolyn Tanner (Akron: OSL Publications, 2006).

"The Duty of Constant Communion," by John Wesley, in *The Works of John Wesley, Volume 3*, edited by Albert C. Outler (Nashville: Abingdon Press, 1986), pages 427-39.

"The Means of Grace," by John Wesley, in *The Works of John Wesley, Volume 1*, edited by Albert C. Outler (Nashville: Abingdon Press, 1984), pages 376-97.

Worshiping With United Methodists: A Guide for Pastors and Church Leaders, by Hoyt L. Hickman (Nashville: Abingdon Press, 1996).

Worship Matters (Volumes I and II), edited by E. Byron Anderson (Nashville: Discipleship Resources, 1999).

Txog Tus Sau

Xibfwb doctor E. Byron (Ron) Anderson yog ib tug kws xibfwb qhia txog kev Pehawm ntawm Styberg hauv lub tsev kawm Garrett-Evangelical Theological Seminary, Evanston, Illinois. Doctor Anderson yog ib tug xibfwb Giám Lý nyob rau cheeb tsam Minnesota.



DISCIPLESHIP MINISTRIES

The United Methodist Church

1908 Grand Avenue
Nashville, TN 37212
UMCdiscipleship.org
877.899.2780
info@UMCdiscipleship.org

COM2404